

## GUILTS NE GLO PXEEL PABL LO ZHA CORINT

¡Diuzh to grëse to! <sup>1</sup> Naa nac Pabl, ible Dios bzooblo naa znu quiayun naa xtsiin Jesús. Grop no bets ne Sóstenes rquiaa guits rii rxeel no lo to.

<sup>2</sup> Laaw ziaad lo to i, grëse to ne nac to zha ne ngable xnëz Dios no to guiedz Corint i, nac to zha ne bredz Dios ngab lo me, psanmbe me to zeene laa to bliladz Jesús; zigne psanmbeque me grëse miech ne no dib lo guidzliu, zha ne bliladz Jesús, men ne rnabey ne grëse ne.

<sup>3</sup> Dios men ne nac Pxoze ne, ni Jesús men ne rnabey ne, me gacnien to, me glu lo to ganle pa lotaa noxco me to; zeena peet tsienied guic to.

<sup>4</sup> Gzataa zeene rzodiidznie naa Dios, rded naa xquizh lo me por grëtaa ncuaane zineedz me lo to, niina ne laa to rliladz Jesús. <sup>5</sup> Sac gon porne rliladz to Jesús, blactaa ziyunlay me lo xquielmban to, noyacnien me to quiayoguicraa to zha nac zhiwseed me, rien to zha gnee tow lo miech. <sup>6</sup> Rlu zienal to mine nac Xtiidz Jesús, zigne binse tow, <sup>7</sup> gacxe waa bneedz Dios grëtaa guielbiini lo to, zeena guien to zha gban to, laga quiambëz to gdzin dze ne guiaad Jesús men ne rnabey ne. <sup>8</sup> Ni Dios nac men ne gacnien to tiblifique gac to lo Xtiidz Jesús, zeena ni tib falt rapde to gal dze co. <sup>9</sup> Sca nac xtiidz me, ni mesi gon ctsëed me mine rnee me, ible laa me bredz to gacnie to Xpëed me Jesús, men ndzon ne rnabey ne.

<sup>10</sup> Gacxe waa bets, bzian, laa naa rso diidz lo to niowse golgac, tsodildraa to. Ine tipse golgac grë to, tel pe nac dziin ne gun to, tel pe rzac to, tipse golnee. Ne nligaa golgona, zig nac zeene Jesússhal noso diidz rii lo to. <sup>11</sup> Sac

gon̄ nē tib zhalidz Cloé lo naa nodillsa to i; <sup>12</sup> no to dien̄ cho xnēz ngab to. No to rnee: “Xnēz Pabl no naa”; riasaque zha ne rnee xnēz Apol no zho, rrieequiagaa zha ne rnee xnēz Pedr no zho; haxta no zho rzac zhase nac zha ne nlipaa no xnēz Jesús. <sup>13</sup> Ne squi rac to, ¿pe rzac to dzigo squi nzian lē nac Jesús? Zha ne rnee xnēz Pabl no zho, ¿pe niacxe naa pquia lo cruz gozh xtoḷ zho?, ¿te brobnis zho ye par ygab zho lo naa?

<sup>14</sup> ;Xquizh Dios led naad pchoobnis to grē to, lēēse chop zha ne pchoobnis naa nac Crisp ni Gay! <sup>15</sup> Zeena tsod pe nacne guiab to xnēz naa ngab to, sac naa pchoobnis to. <sup>16</sup> Ah, ni naaque gon̄ pchoobnis grē men̄lidz Stef. Bod lēēse zha ne pchoobnis naa ga, <sup>17</sup> sac gon̄ pxeeldaxe Jesús naa waa cchoobnis naa miech, sinque laa me pxeel̄ naa cseed naa zho gacnaḷ zho zha grieelo laa zho lo doḷ. Haxta bod ligase bzhaac to miḷne biaḷne naa lo to, sac ib zanaḷd naa pe guielrac, pe diidz ngaḷ ne gne naa; sac nacda gleynie miech zha rnee naa, sinque gliladz zho cho nac Jesús, pe nacne gut me lo cruz.

*Diosse nac men̄ ne rien̄*

<sup>18</sup> Miḷ co nagon̄ noxco naa, maase niicle no grē zha ne rzac ncuaane paat rquiind ga been̄ Jesús gut me lo cruz, per lēē zha co nole nēz ne nitlo zho; sangue ne ne nac ne zha ne psilaale me lo doḷ, ndion̄ ne gan̄le ga blu pa lotaa nac poder ne rap Dios. <sup>19</sup> Noyaca zigne zhobneeque lo Xtiidz Dios, zeene rēb me:

Znitlo naa grē guielrac ne rzac zho csilaa zho,  
niicle rzac zho mazdraa zhooba guic zho,  
ni lalnu yquiinda.

<sup>20</sup> Ni nligaaw, grē zha rac, grē zha rien̄, grē zha ne rzob dien̄ cho nroobraa rac, ib blud grē zhiwseed zho ga lo zho zha csilaa Dios zho, chogaa nac Dios. Ga blu Dios gan̄le lega nacse grē guielrac ne no lo guidzliu rii. <sup>21</sup> ;Diosse

nac men ne rien! Bien me grieelod gunbey miech me por xquielrac zho, nacne bnabey me zha ne dib zdoo gliladz xtiidz me, zha co csilaa me; niicle ne rzhidznie miecha, rzac zho ncuaane paat rquiinda.

<sup>22</sup> Zig nac grë zha Israel, grë zha Gres ncuaane paat rquiinda rzac zho. Grë zha Israel, racladz zho ganlo zho grë milagr nroob par glu ne diidzliw; laa zha Gres na zienalgaa gaca zigne nac zhiwseed zho, sac laa zho zienal guielrac ne no lo guidzliu rii. <sup>23</sup> Gacxe waa zeene rnee no lo zho Jesús men ne pquia lo cruz, men cose csilaa miech, rlëë zha Israel ron zhow; laa zha Gres, rzhidznie. <sup>24</sup> Sangue ne, ne nac ne zha ne bredzle Dios bzëëb xnëz me, zigtaa zha Israela, zigtagaa grëraa miecha, ndion ne ganle Jesús nac men ne biaadlu pa lotaa nac poder ne rap Dios, me biaadlu pa lotaa nac xquielrac Dios. <sup>25</sup> Mine rzac miech paat rquiind ga been Dios, ni nand zho ndziibguicraa nac min co lo grë xquielrac zho; zha ne rzacгаа cholze cho men nsis ga sca gut lo cruz, ni nand zho lëë men co mazdraa ndip lo grëse miech guidzliu.

<sup>26</sup> Bets, bzian, golgan ganle lo grë to ne nac to zha ne ngab xnëz Dios, led grëde to nac zha rien nëz lo miech, led grëde to nac zha non, zha ne ziaadgaa lo grë dii ne nziuu lo zho. <sup>27</sup> Per ib laa Dios nobedz grë zha ne rzac miech peet rien, grë zha ne rzac zho nac zha nsis, parne gunctoladz me grë zha ne rzac zho nac zha rac, zha non. <sup>28</sup> Laa me nobedz grë zha ne sca rzac miech paat rquiin, zha ne rzac zho peet nond, parne guioog ro grë zha ne rzac zho nac zha non, zha nziuu. <sup>29</sup> Ga rlu me ganle ni tib choot grieelod gacniats lo me. <sup>30</sup> Golwi ganle, niapse por me laa ne nacie Jesús, grë guielrac, grë guielrien ne rdziaap ne, Jesús bneedza, ni Jesús nac men ne psilaa ne lo grëtaa xtol ne, men ne psanmbe ne laa ne bziaab xnëz Dios. Dios bnabey sca goca. <sup>31</sup> Gacxe waa choot grieelod gacniats,

zigne ziaadaque lo Xtiidz me zaatne rnee: “Zha ne racladz gacniats, mazd gunnon zho Dios por grëtaa ncuaañe ruñ me.”

## 2

### *Xtiidz Jesús bnee Pabl*

<sup>1</sup> Gacxe waa tel naa, golsoladz ganle bets, bzian, len dze ne bialseed naa to Xtiidz Dios, bned naa dien pe diidz nroob, dien pe diidz ndzielguic lo to. <sup>2</sup> Bend naa dien peraa nseed naa to, sinque mine nac zhiwseed Jesús min co bialne naa, zeena gacnan to cho nac me ni pe nac ne pquia me lo cruz. <sup>3</sup> Lega gzhe gzhe rac naa, haxta rzhidz naa, rdzieeb naa no naa lo to. <sup>4</sup> Zeene laa naa psilo bne Xtiidz Dios lo to i, gon to ganle ib bned naa zigne rnee grë zha ne nac zha rac lo guidzliu rii; per blu Espíritu Sant ganle nacda beelze pe wseed, ni blu ganle pa lotaa poder ne rap Dios. <sup>5</sup> Sca bne naa lo to, sac laa naa racladz zha ne gbig sëëb xnëz Dios, me gnalo zho, gnalod zho grë mine nac xquielrac miech.

<sup>6</sup> Parga nli no zaatne rnee no grë diidz nroob, diidz ndzielguic, per laa min co rnee no lo grë zha ne rienraa zha nac Xtiidz Dios, ni nacdgaaw zigne nac grë xtiidz ndzielguic grëraa miech, grë diidz ne rleynie grë zha rnabey ne no lo guidzliu rii; sac zigtaa zhaw, zigtagaa zhiwseed zhow, ncuaañe tibrded naca. <sup>7</sup> Grë diidz ne rnee no, ndzielguic naca, sac zhiwseed Diosa, lëë xquielrac me ga. Ndzielguica, sac ga rlu me zha no guic me csilaa me miech gdziñ zho lo guielndzon ne no me; gocnand miecha padzeela, per nolew zeene bzaa me guidzliu. <sup>8</sup> Grë miech ne no len dze rii, rioguidc zho zha nac xquielrac Dios; sac telne nioguidc zhow nabeyd zho nquia men ndzon ne nac Jesús ga lo cruz. <sup>9</sup> Zigne zhobneeque lo Xtiidz Dios, zaatne rnee:

Ncuaane wlaltaa gard guien miech,  
 nac grë miñe quianiele Dios gdeed me lo grë zha ne nlipaa  
 gbig lo me gleynie zho me.

Ncuaane choot gard gana, ncuaane choot gard gona.

<sup>10</sup> Sangue no laa no ndionlew, sac pxeel me zhiEspíritu  
 me blu lo no zha naca, men co nan grëse miñe no guic me.

<sup>11</sup> Zig nacse tib miech, grieelod gacnanpaa ne dien pe  
 nac miñe no guic zho, pe nacgaa miñe rza zdoo zho,  
 loxaque zhiespírituse zho nana; scaque Dios, loxaque  
 zhiEspíritu me nan grëse miñe no guic me gun me. <sup>12</sup> Ni  
 tel no, Espíritu co nacie no (nacie no espíritu ne  
 quianzë lo guidzliu rii), ni ible laa Dios pxeel me lo no  
 zeeña gacndion no zha nactaa grë ncuaane nole guic Dios  
 gneedz me lo ne. <sup>13</sup> Zeeñe rzeet no grë guielnzaac co, laa  
 no rneew zigne rneedz zhiEspíritu me guielbiini lo no,  
 rneed now zigne riab guic grë zha rac ne no lo guidzliu  
 rii. Laa no rnee grë min co zigne rlu zhiEspíritu mew, ni  
 ible laaw nac par grë zha ne rioguicle zha racladz Espíritu  
 co.

<sup>14</sup> Grë zha ne nacie zhiEspíritu Dios, cholze miech nac  
 zho, grieelod tsoguic zho zha nac grë miñe rlu Espíritu co  
 lo no. Rzac zho ncuaane paat rquiind naca, sac grieelod  
 guien zhow ne zhase. <sup>15</sup> Sangue zha ne rioguicle zha  
 racladz Espíritu co, rien zho pe nac miñe rlu me.

<sup>16</sup> Ni nligaa zha guien zhow, zigne zhobneeque lo Xtiidz  
 Dios, zaatne rnee: “choot grieelod gacnan pe nac miñe no  
 guic Dios gun me, choot grieelod glu lo me pe nac miñe no  
 gun me.” Per no, ndion now, sac grë ncuaane nan Jesús,  
 bneedz me diidz lo no ye no gocndiona.

<sup>1</sup> Bets, bzian, ne nligaa gard grieelo gne naa lo to zigne rne naa lo grë zha ne rioguicle zha nac miñe racladz zhiEspíritu Dios, sinque tibaque laa naa rne lo to zigne rne naa lo grëraa miech guidzliu, sac rrieequia bii mëdyeen nac to lo zhiwseed Jesús. <sup>2</sup> Niapse ncuaañe ligase ziseed naa to, laa ne cseed naa to ncuaañe ndzielguic. Rrieequia nidzse nonedz naa quiaye to, laa ne gow to grë ncuaañe row zha gol. Haxta niinagaa gard tsoguic to zha nac grë miñe ndzielguic, <sup>3</sup> sacne laa to bii zianañ miñe ruñ miech guidzliu, laa ne guñ to miñe racladz Dios. Golguien ganle zha rac to, no to rlozhd glëëlsa to, rlozhd tillsa to. ¡Led squid gon no gac zha ne nole xnëz Dios! <sup>4</sup> Pe i na rriee bla to rnee: “Tel no xnëz Pabl no no”, rrieequegaa zla zha ne rnee: “Tel no xnëz Apol no no.” Gase rlu ganle zianañde to miñe racladz Dios, sinque laa to zianañ miñe no guic to.

<sup>5</sup> Nana, ¿cho nac Pabl, chogaa nac Apol parne no yquiaaqui tsodil to? Nli no biadseed to Xtiidz Dios, per tib ngundziin winse nac no lo me, bdziuuñ no miñe rnabey me no. <sup>6</sup> Nac cuent rii zig nac tib guielgon, naa blo bni liu, laa Apol bgaala; per Dios nac men ne bnabey blana ni me pchooba. <sup>7</sup> Golwi sca ganle Diosse nac men non, sac me pchoob bni co, tel no peet ncuaañe nroob bdziuuñd no, lëë gdib tib bloo bni liu, stib bgaala. <sup>8</sup> Zigtaa zha ne bloo bni liuw, zigtagaa zha ne bgaala, lal nac zho grop zho; ni Diosse nac men ne gdeed miñe rieguañ zho tib tib zho por dziin ne been zho. <sup>9</sup> Tib ngundziin winse nac no lo Dios grop no Apol; laa to nac zig tib lë liu ne quiayan Dios, zig tib yu ne quizaagaa me.

<sup>10</sup> Pa lotaa wen Dios, sac bzooblo me naa naa psilo yu co, ni blu me lo naa zhapaa none tsaaw. Nli naa bгаа blee xcimienta, per niina zhaale zha ne nosoquiaw. Tib tib zha ne nosoquia yu co, none guien zho zaacse gzhixcuua zhow, tsianañ zho zigne nacse xcimienta ga, <sup>11</sup> sac gon nod

pe nacne csëëb zho stib cimient, tibaque cimient no, lëë cimient co nac Jesús.

<sup>12</sup> ¡Laa cimient co nole! Nana no zho gzaa yu co niapse guiib or, niapse guiib plat, no zho gzaaw grë quie niazh, no zho gzaaw yag, nogaa zho gzaaw grë pe guizh, pe yag xiidgaa. <sup>13</sup> Zeene gdziñ dze ne laa Jesús guñ guielwxtis, ga glu dien zha nac xtsiin zho; sac gal dze co grësew laaw none ted lo gui, ga glu dien pa miñ lëbraa. <sup>14</sup> Zha ne pquiin ncuane rlëb lo gui, ib tedsod zgaa zho miñe rieguial zho gdeed Dios lo zho; <sup>15</sup> laa zha ne pquingaa grë ncuane znuse rec, mbe scase nitlo xtsiin zho. Peet ycaaniad zho, haxta zha pense tel zha laa zho lo gui co, zigne rzac zha ne rec lidz.

<sup>16</sup> Golgacnan ganle xyadoo Dios gon nac to, sacne zdo to rbëz zhiEspíritu me. <sup>17</sup> Tel xyadoo Dios, tib yadoo mbe, tib yadoo nda naca; gacxe waa, zha ne gnitlow ib tedsod znitlo Dios zho. <sup>18</sup> Golguien sca zaacse golgac, tel no zha ne rzac nroob rac zho wseed lo guidzliu rii, gnalod zho miñ co; nend lel lo co no zho, ygaad zho miñe nacpaa guielrac, guielrac ne rneedz Dios. <sup>19</sup> Sac gon grë guielrac ne no lo guidzliu rii, ncuane beelze naca nëz lo Dios. Zigne raquetaque lo Xtiidz me zaatne rnee: “Grë zha rac ne no lo guidzliu rii, lëëque lo grë guielrac ne zianal zho, ga rlu Dios ganle paat rquiinda.” <sup>20</sup> No stib zaatne rnee: “Nanle Dios grë zhgab ne nonie guic grë zha rac, ncuane paat rquiinda.” <sup>21</sup> Tso de to sca lozhd gacniats to dien cho xnëz miech guidzliu rii no to, golguien ganle grëtaa ncuane no, laa Dios psana par yquiina lo to. <sup>22</sup> Zig nac guidzliu, guielmban, guielgut, ladznia to now, niicle ncuane no niinaw, ncuane naragaa ziaada, chen tow; haxta Pabl, Apol, Pedr, ib laa no zo nu par dziuun no xyudar to. <sup>23</sup> Grëse to tibaque xnëz men ne no to, lëë men co nac Jesús, men ne pxeel Dios.

## 4

*Zha rzac zha ne rienee xtiidz Dios*

<sup>1</sup> Golguien sca tib moz winse nac no lo Jesús, laa me bzoo no noseed no miech xtiidz me mine gocnand miech padzeela. <sup>2</sup> Ni zha ne gon znu run tib dziin, ible none nguzobdiidz gac zho lo men ne rnabey zho. <sup>3</sup> Gacxe waa tel zha rzac to naa, tel zha rzacгаа grëraa miech naa, peet zienied guic naa. Haxta ni mine rzaac naa nac naa, peet nonda, rieguald guiep naa znutaa znutaa nac mine noyun naa. <sup>4</sup> Nli peet dzeb nonied guic naa guiep naa nend cho pe glisqui lo naa, per led mincod gni naa ni tib dol rapdraa naa; loxaque Dios nan zha nac naa, me gneedz mine gaguaal naa. <sup>5</sup> Gacxe waa, gunde to ne glole to guiab dien cho nac zha ne wenraa; sac min co gun men ne rnabey ne gal dze ne laa me guiaad. Gal dze co, me cxobnen ganle zhapaa nac ne tib tib ne, haxta grë mine rza guic ne, mine no zdoo ne, laaw glu me; grë no ne nodziuu no xtsiin me, dze co laa me gneedz mine riogualpaa no tib tib no.

<sup>6</sup> Bets, bzian, niina ne nozet naa no lo to nu grop no Apol, quiayunnond naa naa, niicle nosanwindгаа naa me. Ga sca ganle golwi, zeena cseed to gban to zigne nac Xtiidz Dios, tsođe to lozhd dien cho non, chogaa nond. <sup>7</sup> Stiba, ¿cho nadien në lo to ne gunnon to to? Grë ncuane rap to, grë ncuane rac to, ¿niacxe led Diosd bneedza lo to? Dios name bneedza lo to, ¿pe nac dzigo no to rlozhd gacniats to zig nac zeene por xquielliger to bgaa tow? <sup>8</sup> Niats rac to, masaque rzac to grële zhiwseed Dios nan to, gaxle zo to lo me, haxta rzac to tole nac zha rnabey, paat rquiindraa no. Wenzhe tebaa nligaa zha rnabeyle nac to, zeena haxta ye no zley no.

<sup>9</sup> No hor rzaac naa, diunavez win psan Dios no ne nac no zha ne nonee xtiidz me, loxaque lo no rwi miech, rwi



grë anj dien zha rac no; zig run miech rieso zho lo zha ne rnabey zho ret. <sup>10</sup> Ne znu quiadziiuun no xtsiin Jesús, masaque zha yozh nac no lo miech, laa to gon xquizh me zha rien nac to lo zho. Zha nsis, zha zozhidzle rzoob zho no, laa to zha ndaan, zha ndip nac to. Masaque zha nziuu nac to lo zho, laa no rzac zho ni gand zho lo no. <sup>11</sup> Haxta lo nadze blactaa zaatne retgbin no, zaatne retnis no, per ni lidz no, per ni lar ne dziaacw no guiend, rdib rdzaag no rdziuuun no dziin rdziniaa no ncuaañe rquiin no. <sup>12</sup> Ni rlozh ga rrieeque miech rsacsi zho no. Rrieequia zha ne rdzibdee no, per rdziuuund no gdzibdeequ no zho, sinque mazd rnab no lo Dios gunlay me zho; zha ne rtsidiñ no, rdziuuuncasd no zho. <sup>13</sup> Rrieequia zha ne në rnee lo no, per no, diidz wen rtsire no lo zho. Masaque rzac miech no, zig rzac zho grë ncuaañe paat rquiindraa, zig rzac zho grë ncuaañe nole lo guizh.

<sup>14</sup> Laa naa rzet grë min rii lo to, per nacda par gunc-toladz naa to, sinque laa naa rzeta zeena guien to zaacse gac to, golguien ganle rleynie naa to, rzaac naa to zig tib xpëed naa. <sup>15</sup> Niicle niaca mine ndal zha ne guiadseed to i, niicxe guiaad nzian mil zho waa, per led grëd zho tsoxcopaa to zig rioxco tib dad xpëed zho. Zigne rne naa ga, xpëed naa nac to, rrieequia pxoz to nac naa, sac gon naa glo bialne xtiidz Dios lo to, laa to bzëeb xnëz Jesús. <sup>16</sup> Goltsoxco sca, golban zigne mban naa. <sup>17</sup> Ni ible mincopaa gon laa naa rxel Timoté ziaad lo to i, lëe stib xpëed naa i, ne nligaa rleynie naa me, tib zha nguzobdiidz nac me lo men ne rnabey me. Laa me ziaad i, me gzodiidz lo to ganle zigne rseed naa miech grëse zaatne ziyateed naa, scagaa noxco naa mban naaw.

<sup>18</sup> Rien naa no bla niats ne nac to i, rzac nlidraa guiañ naa lo to i stib. <sup>19</sup> Gacnan zho ganle, gneedzse Dios diidz, ible laa naa none guiañniob, dzigo bii zdziañ ne dien pe nli na

nacnie zho xpoder Dios, te loxaque rnee zho ye. <sup>20</sup> Sac gon zha ne ngab xnëz Dios, grë mine rnee zho none glu nacnie zho xpoder me, nacda loxaque diidzse. <sup>21</sup> ;To nadien zha racladz to? ;Pe rdziladz to guial naa guialgactox naa lo to i, te mazd wen ye niapse diidz ndooladz, diidz nex guialne naa lo to?

## 5

*Zha ne runctal xto!*

<sup>1</sup> Zëëb diidz gon, lad to i no tib zha bgui ne quiayun tib dol nroob; per ni grëraa miech ne gard gliladz Xtiidz Dios rund min co. Bin naa lëëque xniaa pchoob zho quiangob zho. <sup>2</sup> ;Yo na ne rzac to grële zhiwseed Dios nan to, gaxle zo to lo me! ;Laa ne ctoladz to, laa ne tso to guielnë, cuee to zha qui lad to, le! no to rlozhd gacniats to!

<sup>3</sup> Niicle ne zozhaald naa lo to i, per zeene bin naaw tibaque nonie guic naa zha gaca. Nu laa naa gni lo to ganle zha riegual gac zha co: <sup>4</sup> Grë to ne nac to zha ne ngab lo Jesús, rnab naa lo to ycaalsa to zigne rnabey me. Ndionle ne ganle zeene laa to ycaalsa, ga zo Jesús lo to, scagaa naa, golgun cuent lo to i zo naa. <sup>5</sup> Squi ndxie to grë to, golzonëz zha co, golcueegazh zho lo to i, tsie zho tsietsobe zho ladznia mendox, ga tednë xcuerp zho guien zho ganle pe noyun zho; nan new togo zzhixcuuaa zho stib, zeena ycaania Jesús zho gal dze ne laa me gbiire guiaad.

<sup>6</sup> ;Xlëse gon squitaa racniats to rzac to zha mbe nac to, ni randze to zha ne quiayun doldox qui! ;Pe riende to telne glisquide to mine quiayun zho, ib tedsod zrieequiaraa zha ne squi guncal xto! <sup>7</sup> Zha ne squi nac, masaque nac zho zig nac grë guielguidzdox ne znuse rded; golcueegazh zho sca, zeena ine mbe gac to nëz lo Dios, tete to guielguidz qui. Golguien ganle laa Jesús psanmbele ne, mincopaa gut me, goc me gon nëz lo Dios zig carner yeen

ne rgogon zho lo me lni Pascw. <sup>8</sup> Golgotsaa gban ne zigne racladz Dios, grëse tel zha wban ne glo, grëse guielyozh, grëse guielntseeb ne bdziuuñ ne, none csaan new grësew. Ndzinli sca golgac, goltsienal mine nac diidzli; none mbe gac to nëz lo Dios, zig guietxtil ne notsd ncobi.

<sup>9</sup> Lo stib guits ne pxel naa lo to ga, laa naa psole diidz lo to ganle ctsieelsade to grë miech yozh ne ndzinlid mban.

<sup>10</sup> Zeene sca pso naa diidz lo to, guiabde to togo naca parne ctsieelsadraa to grë zha ne gard gliladz Xtiidz Dios, zha ne rquiangob zha ne led tseeld, grë zha ne zienal loxaque gunlo dimi, grë zha ne run guielgbaan, grëgaa zha ne rnalo grë mdio. Led zha coda, sac laga mban ne lo guidzliu rii, ible zanlsa ne grë ne zho. <sup>11</sup> Sinqe zha ne bzet naa ga ctsieelsade to, nac zha ne nacle diidz xnëz Dios no zho, ni noque zho quiayunctal zho xtol zho, no zho rquiangob zha ne led tseeld zho, no zho zienal loxaque gunlo dimi, zhiga zhiga laa ne gleynie zho Dios lel zhaa ncuane rleynieraa zho, no zho rquiadiidzguizh samiech, no zho rzudz, nogaa zho run guielgbaan. Ne nligaa zha ne sca nac, per ni tib guielwagw gowniede to zho. <sup>12</sup> Tel grëraa zha ne gard gliladz Xtiidz Diosa, led ned riogual glisqui mine quiayun zho, Dios nac men ne gunquizh zhow. <sup>13</sup> Sangue zha ne nacgrë ne, zeene noyun zho tib ncuane ndzinlid, ib rieguial glisqui new lo zho. Gacxe nana sca, zha ne squi quiayunctal xtol i, golcueegazh zho lad to, ni spalal gandzedraa to zho.

## 6

### *Zha none gac guielwxtis*

<sup>1</sup> Laa to gocnanle ganle, to rieguial glisqui tel pe nac ncuane nonguield run zha ne nacgrë to. Lëda i gon run to, zeene pe tib dil rap to, lëëlëd zie to lo wxtis laa ne gbig to lo zha ne nacgrë to, zha csiooglo lo xtil to. <sup>2</sup> ;Niacxe

nan̄de to zha ne ngab xn̄ez Dios, zha co cobey zha nac xtol̄ gr̄eraa miech zeene gal̄ dze ne laa Dios gnabeya? ¿Pe nac dzigo grieelod tose csiooglo lo tel̄ pe dil̄ win ne rap to? <sup>3</sup> Haxta gr̄e anj̄l name, ne gon̄ cobey pe nac gr̄e mine quiayun̄ zho. Gacxe waa, gr̄e dil̄ ne rac lo guiel̄mban rii, ne riogual̄ cobey zha guiooglo low. <sup>4</sup> Sca gon̄ gun̄ to, led node to, rnadse pew laa to ziele lo wxtis. <sup>5</sup> ¿Pe ni tib l̄e guiel̄to guien̄d lo to? Lo gr̄e to, ¿niacxe goon̄ guien̄d zha ne grielo gnee lo to, cūez lo xtil̄ to? <sup>6</sup> Nazdpaa rdziladz to dil̄, ¿pe i na l̄ēque zha ne nacgr̄e to quiadīlnie to, ni rlozh ga zieque to zienie to xtil̄ to lo zha ne rliladz Dios? <sup>7</sup> Pe riende to tib guiel̄todoxle i squi no to l̄ēque to quiadīllsa. Mazd gōl̄xecw tel̄ cho pe run̄ to.

<sup>8</sup> Mazdraa gon̄ mbana squi no to rsacsi to miech, ni haxta zha ne nacgr̄e to rsacsi to. <sup>9</sup> Nan̄le to gan̄le zha ne squi run̄ guiel̄ntseeb, grieelod gdziñ zho zaatne rnabey Dios. Tsieniewguite guic to sca. Gōl̄soladz gan̄le gr̄ese zha ne run̄ guiel̄yozh:

zig nac zha ne rquiangob zha ne led tsieeld zho,

zig nac zha ne rquiangob zha ne nole tsieel,

zig nac zha ne nac mrazh,

zig nac zha ne rnalo gr̄e mdio laa ne gnalo zho Dios,

ni tib zho grieelod gdziñ zaatne rnabey Dios. <sup>10</sup> Scaque:

zha ne nac ngbaan,

zha ne zienie guic loxaque dien̄ zha gun̄lo dimi,

zha ne nac ngonziu,

zha ne rzhixcuaa diidzguizh,

zha ne run̄güet miech par cuan zho zho;

ni tib zho ygaad guiel̄nzaac co. <sup>11</sup> Blalaa to bio lo gr̄e dol̄ co glo, sangue niina miech mbele nac to n̄ez lo Dios, laa Jesús ni Esp̄ritu Sant psan̄le to zig tib zha ne peet xtold, laa me psan̄wenle to n̄ez lo Dios.

Gunctald zho xtol zho

<sup>12</sup> Nli ndal ncuane zac gun ne, gunctalda xtol ne, niicle choot rcadgaaw, per led grēda rquiin. Tel naa, niicle no ncuane zrieelo gun naa, per rund naaw; sac racladzd naa guien naaw, lozh ga lēew gnabey naa. <sup>13</sup> Zēeb diidz rnee zho: “Laa guielwagw biaan par gow miecha, scagaa zdoos zho laaw biaan par tsodzēw guielwagw.” Nli scaw, per guiabd ne togo por min co lega gowcho ne. Pa rquiin ne lega tedso gow ne, sac gon zigtaa zdoos new, zigtagaa guielwagwa, dzin dze ne gnitlo Diosa. Guielwagw ga na, sangue grē guielyozh nerun miech rquiangob zho zha ne led tsieeld zho, biaan ne par dziuun ne min co, sinque laa ne biaan par gban ne zigne rdziladz Dios, sac me rnabey ne. <sup>14</sup> Tel new nitlod ne, sac gon zigne bleeban Dios Jesús con poder ne rap me, scaque zbeeban me ne zeene laa dze co gdzin.

<sup>15</sup> Golgacnan ganle, rriequia lēē tiblē xcuerp Jesús nu gon nac ne tib tib ne. Nana, ꝑe nonguiēla ga dzigo gdzieel tib lē xcuerp me ga xcuerp tib wnaa ro nēz? ꝑNonguiēlda gon! <sup>16</sup> Sac gon zha ne raanie tib wnaa ro nēz, rriequia tibaque rac zho ga grop zho wnaa co. Rnee lo Xtiidz Dios, par me: “Zeene laa mgui racgrop tib wnaa, tibaque miech rac zho ga grop zho.” <sup>17</sup> Scagaa zha ne rzēeb xnēz Jesús, tibaque rac zho grop zho me, zhiEspíritu me racnie zho.

<sup>18</sup> Gacxe waa, gunde to guielyozh yquiangob to zha ne led tsieelde to. Lo grē dol ne no, min riise nac mine xcuerppaa miech rguinē zho. Sac gon zha ne run guielyozh co, masaque rsanbeed zho zho ga. <sup>19</sup> Golguien ganle, zha ne nole xnēz Dios, masaque zha nac zig tib yadoo zaatne rbēz Espiritu Sant, Espiritu ne rdeed Dios rbannie zho. Led nedraa rnabey xcuerp ne, <sup>20</sup> Diosle rnabeya, sac gon bzhiile me ne ni nroob gocnon ne lo me. Gacxe waa, zigtaa xcuerp new, zigtaa xpensar new, gotsaa

yquiin new par cxobnen ne ganle pa lotaa men nroob nac me.

## 7

### *Rtsire Pabl lo zhiwnabdiidz zho*

<sup>1</sup> Lo guits ne pxeel to lo naa, nzian ncuaane r nabdiidz to, nu ganle laa naa ctsire lo wnabdiidz co: nli wena, telne niaca mine grielow ctsieelniad ne. <sup>2</sup> Per parne tsod pe yquiaaqui cho gun guielyozh, tsonie zho zha ne led tsieeld zho, mazd wena zigtaa mguiw, zigtaa wnaaw ctsieelnia zho, tib tib zho gbanniese zho tsieel zho zigne rieguiala.

<sup>3</sup> Zha ne ptsieelniale, zig nac mgui none gnee zho lo tsieel zho zeene racladz me, scaquegaa wnaa zeene racladz tsieel zho gnee lo zho none siguiel zho. <sup>4</sup> Sac gon wnaa ne rtsieelnia, led zhadraa rnabey xcuerp zho, sinque tsieel-le zho rnabeya; scaquegaa mgui zeene laa zho rtsieelnia, tsieel-le zho rnabey xcuerp zho. <sup>5</sup> Golguien sca, niicle mguiw niicle wnaaw nodne yca zho xcuerp zho lo tsieel zho. Laa telne rzacgaa zho none yquiind zho tsieel zho tib blalaa dze, sac rquiabladz zho gzodiidznie zho Dios, wena totsaque guiaan zhow diidz grop zho. Per zigne ted ga, gbiireque gnee zho lo tsieel zho, sac gon zha ne grielod cxecw, nend ccheep mendox zho gun zho guielyozh.

<sup>6</sup> Ne znu rne naa lo to, guiabde to nagon togo rne naa nopaa ctsieelnia to. <sup>7</sup> Tel naa, rzac naa wena tebaa grese to znu ctsieelniad, zigne nac naa; per na ncuaane gacd ga, sacne zhaase zhaase nac ne tib tib ne. No zho pso Dios ctsieelnia, nogaa zho pso me ctsieelniad, per rley zho mban zho zigne nac zho. <sup>8</sup> Zig nac gre zha ne bii tib, gre gaa zha ne gutle tsieel, wena tebaa grielo scase guiaan zho, <sup>9</sup> per telne rien zho leb d xcuerp zho, dzigo mazd ctsieelnia

zho. Mazd wena ctsieelnia zho, lëdle so zho tib zho ni tel rec rdzu zho.

<sup>10</sup> Sangué zha ne ptsieelniale, laa naa rso diidz lo zho csaand zho tsieel zho, ni nacda xtidz naa, sinque ible sca rnabey Dios. <sup>11</sup> Laa tel zha ne guiaabgaa csaan zho tsieel zho, zaca, per lëëraasi grieelodraa gbiire ctsieelnia zho, mazd mine naca telne zrieelow ycatsieel zho stib, o guiaangaa zho tipse zho.

<sup>12</sup> Nu na ganle laa naa gnegaa chop lan xtidz naa lo zha ne led yed tsieel riladz Xtiidz Dios; tib diidzse naca gni naaw, nacda mine rnabeypaa Dios. Zha bgui ne mbannie tib wnaa ne riladzd Xtiidz Dios, per telne rio guic wnaa gbannie wnaa zho, nodne csaan zho wnaa. <sup>13</sup> Scaquegaa wnaa ne mbannie tib mgui ne riladzd Xtiidz Dios, nod csaan zho mgui co telne riopaa guic mgui gbannie mgui zho. <sup>14</sup> Zigtaa mguiw, zigtagaa wnaaw, zha ne sca mbannie tib zha ne riladzle xtiidz Dios, ye zho runlay Dios ga, nenda haxta zio dze ne ye zho gliladz xtiidz me. Sac telne ctso zho, laa ne gbigraa xpëed zho lo Dios, lel znu sozit mëed. <sup>15</sup> Nana, telne zhalgaa zha ne riladzd Xtiidz Dios ga, rnab csaanlsa zho, peet nacda maase ctso zho, nod pe nacne gzoobguicpaa tsieel zho lo zho cuëz zho. Sac gon zha ne riladzle Xtiidz Dios, laa me bredz zho parne zaacse gban zho, bredzd me zho par tsodił zho; <sup>16</sup> stiba, nanđ zho dien pe zdziñ dze ne gliladz tsieel zho Xtiidz Dios.

<sup>17</sup> Mine naca tib tib to goltsoxco gun to mine rdziladz Dios. Zigtaa zha ne pso me ctsieelnia, zigtagaa zha ne pso me scase guiaan, sca none gac to; scagaa zha ne ncaatsieel-le zeene riladz zho xtiidz me, none sca guiaan zho niicle telne riladzd tsieel zho xtiidz me. Grëse zha ne ngab lo me, diidz rii rso naa lo zho. <sup>18</sup> Zig nac grë zha ne nole bey xcuerp zeene laa zho rzëeb xnëz me, sca no zho

bey co gund zho ne yqueets zhow. Zha ne na nodgaa bey co zeene rzëeb zho xnëz me, scaque nod pe nacne tsopaa zho bey co. <sup>19</sup> Mine mazdraa non lo me, gban zho zigne rdziladz me, guiendraa ne dien cho no bey, chogaa nod.

<sup>20</sup> Zigne rneque naa ga, grëse zha ne rzëeb xnëz Dios, tel zha nac zho zeene laa me bredz zho, scase none guiaan zho. <sup>21</sup> Zig nac zha ne nac ngundziin lo ben, peet tsienied guic zho guiab zho dien zha grieë zho ladznia zha ne rnabey zho; per telne gdeeda diidz, zac tsoxco zho dien zha grieë zho lo zha co. <sup>22</sup> Zha ne sca nac ngundziin lo ben zeene bzëeb zho xnëz Dios, guien zho ganle rriequia zonlaale zho, sac gon laa Jesús psilaale zho lo grëtaa dol ne bio zho. Zha ne nacdga ngundziin lo ben zeene bzëeb zho xnëz Dios, guien zho ganle tib ngundziinle nac zho lo Jesús niina, me rnabey zho. <sup>23</sup> Golguien ganle, grëse to laa Dios bzhiile to ni nroob goconon to, gacxe waa mele rnabey to; ni togaa, lo me none gun to dziin, gdeete to diidz lega gnabey miech to. <sup>24</sup> Sca nasca gon bets gaca, tib tib to zigne nacse to zeene bzëeb to xnëz Dios scase no gban to, ine gleynie to me.

<sup>25</sup> Stib wnabdiidz ne run to ga dien zha gac zha ne gard ctsieelnia, gneli naa lo to ganle, guiend tib xley Dios mine gnabeypaa dien zha gac zho. Per golquiaadiag mine gne naa nu ganle zha rzaac naa, nanle to ganle, zha ne znu rquia zdoos Dios rbedz me, mine rquiin min co rnee zho. <sup>26</sup> Grë ne ne nac ne zha ne riladz Xtiidz Dios len dze rii, nligaa ngan nac lo xquielmban ne, gane zoot naa wena zha ne sca gard ctsieelnia, maase guiaantib zho. <sup>27</sup> Zha bgui ne na ptsieelniale gaa, grieelod gni naa guiaantib zho; sca mbannie zho tsieel zho; per tel zha ne gard ctsieelnia, mazd sobd guic zho ctsieelnia zho. <sup>28</sup> Zha ne racladzpagaa ctsieelnia, zigtaa mguiw zigtaa wnaaw, led dold ga gun zho telne laa zho ctsieelnia; per gacnan zho ganle, zeene



laa zho pcatsieel-le, ib tedsod nroob guiełnë ne gan zho por grë minë noyac leñ dze rii.

<sup>29</sup> Minë none guieñ to: zhisle nac dze ne so ne lo guidzliu rii, led nroob nac ngbidz ne grieelo dziuun ne xtsiin Dios; gacxe waa, zha ne nole tsieel, mazd sac zho zho zig tib zha ne guiend tsieel. <sup>30</sup> Zha ne quianie dimiw, zha ne no guiełbleya, zha ne nogaa guiełnëw, gdeete zho diidz yca grë ncuaan co lo zho par gun zho xtsiin me. <sup>31</sup> Zha ne bienle runfalte grëtaa ncuaane rquiin zho, gdeete zho diidz ctse grë ncuaan co lo zho, sac zigtaa guidzliuw, zigtaa grë ncuaane no low, zdziñ dze ne nitlow.

<sup>32</sup> Minë racladz naa peet zhgab ctsed lo to. Gołwi ganle, zha bgui ne tib, tiblque zienie guic zho run zho minë rdziladz Dios, minë nac xtsiin me. <sup>33</sup> Laa zha ne no tsieel, grielodraa sca gac zho, sac laa guic zho zienie zha gbannie zho tsieel zho, zha grieelo gun zho minë rdziladz me, miñ co rionieraa guic zho. <sup>34</sup> Scaque grë men wnaa, zha ne tib, rioxcoraa zho run zho minë rdziladz Dios, dib nacse zho rbeeladz zho zho lo xtsiin me. Laa zha ne ptsieelniale, xco ne dieñ zha gbannie zho tsieel zho, dieñ zha grieelo gun zho minë rdziladz tsieel zho, xco co rioraa zho.

<sup>35</sup> Laa naa rne miñ rii lo to, per guiabde to togo rca naa ctsieelnia to, sinque laaw rne naa parne guieñ to zha gun to, zeena grieelo zaacse gac to gun to minë rnabey Dios. <sup>36</sup> Zha ne quianie wnaa nguieg, telne rzac zho nonguielda ga scase ted lo xquiełnguieg xpëed zho, sinque none ctsieelnia zho, peet nacda, led dołd ga ctsieelnia zho. <sup>37</sup> Laa telne rzacгаа zho, wenraaw ctsieelniad xpëdwnaa zho, ible scale pquiabladz zho guiaan mëed, wenaque ga telne sca rzac zho. <sup>38</sup> Wen ga gun zha ne sca gdeed diidz ctsieelnia xpëdwnaa, per mazdraa wen ga gun zha ne rzac mazd ctsieelniad xpëed.

<sup>39</sup> Nana, wnaa ne retgaa tsieel, nli zeene mban tsieel zho rnabey ley ne tsieelse zho gbannie zho; per zeene laa tsieel zho ret, zac ctsieelnia zho tel cho stib mgui ne racladz zho, totsaque zha ne noque xnëz Diosa. <sup>40</sup> Per tel naa, rzac naa mazdraa wen gban zho telne tsodraa guic zho ctsieelnia zho stib; sca nagon rzaac naa wena, ni led xtiidzse naaw sac rien naa led tibd naa, Espíritu Sant nacie naa.

## 8

### *Bëël ne rgogon zho lo mdio*

<sup>1</sup> Stib wnabdiidz ne run to ga, dien zha nac guielwagw ne rgogon zho lo grë mdio, pe zrieelo gdioowa, te grieeloda ye. Zootle na grële to nan min co; per no hor zeene squi rzac ne grëlew nan ne, lel racniats ne, laa ne gacndooladz ne gnee ne lo grë zha ne nacgrë ne dien zha gun zho parne tsoguicraa zho Xtiidz Dios. <sup>2</sup> Zha ne rzac grëlew rac zho, ga rlu zho ganle peet riend zho. <sup>3</sup> Tel Dios runbey me tib tib miech, nanpaa me cho nac zha ne rleynie me.

<sup>4</sup> Zhapaa dzigo gaca, ¿pe wena dioow ne xpëël grë ma ne rgogon zho lo mdio ga, te wenda ye? Ndionle ne ganle grë mdio ne riegan miech led Diosd ga, tibaque men ne nac Dios no. <sup>5</sup> No zho rzac nziandox Dios, nziandox men rnabey no, no me no gbaa, nogaa me no lo guidzliu, <sup>6</sup> sangue ne ndion ne ganle tibaque Dios no, lëë men co nac PxoZ ne, me psan grëtaa ncuaane no, me psan ne parne dziuunbey ne me. Ni scaquegaa, tibaque men ne rnabey ne, lëë me ga nac Jesús, me bzaa grëtaa ncuaane no, me nac men ne rneedz xquielmban ne. <sup>7</sup> Per no zha ne riladzle Xtiidz Dios, bii gardaque guien zho ne tibaque Dios no. Tibaque rzac zho mban mdio, gane zeene rquiin zho bëël ne rgogon zho lo mdio racchop guic zho, lëëque

zha runctal xtol zho ga sca run zho. <sup>8</sup> Golguien sca, tel Dios rwid me dien cho pe row. Guiabd ne togo por gow ne o gowdgaa ne bëel co laa ne guianzuiuu lo me.

<sup>9</sup> Laa to nanle nasca, peet nacda yquiin to guielwagw co, per scagaa golcobey adel min co yquiaaqui gunctal to xtol tib zha ne squi bii racchop guic. <sup>10</sup> Sac gon, nenda tibliladz to zob to zaatne riegan gre miech mdio noquiin to bëel co, ni gan tib zha ne bii racchop guica. Zeene gan zho to, nend yeque zho gbig gow zhow, per zeene lozh ga tibaque laa guic zho tsienie lëda ga been zho. <sup>11</sup> Zha ne sca gun, niicle ne nli rien zho peet nacd ncuaañe noyun zho ga, per por zha laa zha co gunctal xtol. Guncscade to, golguien ganle ye zho ga psilaa Jesús zeene gut me lo cruz; <sup>12</sup> gacxe waa, telne sca gun to por to yquiaaqui gun zho tib ncuaañe rzac zho nonguield, lole Jesús ga quiayun to falt. <sup>13</sup> Min co nagon, tel naa mazd maase gowd naa bëel co, telne por min co yquiaaqui gunctal naa xtol tib zha ne nole xnëz Dios; sac lëda ga gun naa gac naa zig tib quie ne griel ni zho.

## 9

*Mine* riegual zha ne run xtsiin Dios

<sup>1</sup> Zigne nagon zac gun to gre ncuaañe wen ne racladz to, scaquegaa naa, zac gnab naa ncuaañe wen ne racladz naa. Tel naa gonlo naa Jesús men ne rnabey ne, Dioszhal bzo naa pxeel me naa none naa Xtiidz me. Ne squi ptsëe Dios lo xquielmban to zeene bialseed naa to, i rlu ganle me nacie naa.

<sup>2</sup> No zha ne rzac nlid Dios pxeel naa, sangue to nanwen to ganle me pxeel naa, sac gonlo to mine ben naa, mine blu naa; ni scagaa niina, lo xquielmban to i rlu ganle ne nli xtsiin me quiayun naa. <sup>3</sup> Gre zha ne sca rzac nlid Dios pxeel naa, rzac zho peet raguald naa, gacnan zho

ganle: <sup>4</sup> ;Raguial naaw gon! Ni grëragaa zha ne rdziuungza no xtsiin Dios, riogual no gneedz to ncuane yquii no, gneedz to zaatne gbiaaz no. <sup>5</sup> Tel naa, haxta raguial yquianie naa tib men wnaa ne gac tseel naa, ine sènie naa me zigne run grëraa zha ne rdziuungza no dziin rii, zig nac Pedr, zig nacgaa grë zha bets men ne rnabey ne. <sup>6</sup> ;Te loxaque grop no Bernabé naye znu zhaaque no dziuun no stib dziin, par gdziniaa no ncuane dioow no? <sup>7</sup> Golgan ganle, zig nac zha ne rzëeb lo xtsiin menguiib, ;niacxe zhaa lo dziin ne rdziniaa zho ncuane row zho rio zho lo xtsiin menguiib? ;Zha ne rangaa, niacxe rieguald zho yquii zho ncuane rac zaatne ran zho? ;Zha ne na rangaa ma, niacxe rieguald zho yquii zho ma zigne racladz zho?

<sup>8</sup> Guiabde to togo bod guicse naa riab mine rne naa nu, golgan ganle haxta lo ley ne psan Moisés <sup>9</sup> no tib zaatne rnee: “Zeene guncun to xcon to dziin gzëeni ma mzion zhobxtil gacmbew, code to guix ro ma, golsaan gow ma mine yгаа ro ma.” Golwi ganle zha rnee Dios, nana pe nan to ngonse rquia zdoo me. <sup>10</sup> Lëda gon, grëse ne rquia zdoo me ne. Ga rlu me ganle, zha ne run xtsiin me, ible riegual zho ycaa zho mine non xtsiin zho. Zig nacaque guelgon, zigtaa zha ne rana, zigtagaa zha ne runmbe grë guelzaac co, ible riegual zho yquii zhow. <sup>11</sup> Tel no, rrieequia nazho tib gon i bdziuun no biadseed no to Xtiidz Dios, ;niacxe rioguald no dzigo gneedz to ncuane yquii no?

<sup>12</sup> Blalaa zha ne nale griin riaadted lo to i, rnabey zho to rdeed to ncuane rquii zho, ;pe lel no dzigo rioguald gnaba lo to? Mazdraa gon riogual no gnab now, per haxta lo nadze gard dziuun no min co, notaa nan zha rdziniaa no ncuane rdioow no; zeena guiaand zdoo to, lozh ga laa to csaan mine nac Xtiidz Dios. <sup>13</sup> Led nanle to ganle,

grë zha ne run dзиin len xyadoo Dios, psan me diidz grë ncuane nac gon, ga xen zho pe yquiiin zho, zig nac zha ne run dзиin zaatne nac lo pcoog, lo ncuane rielogon miech ga, ga rdioob ncuane row zho. <sup>14</sup> Ni scaquegaa psan Jesús diidz, zha ne cseed miech Xtiidz me, ib none lo dзиin co gdziniaa zho pe yquiiin zho. <sup>15</sup> Per tel naa gon, waltaa peet gard gnab naa lo miech.

Laa naa rzet min rii lo to, per guiabde to togo run naaw parne csilo to pe gneedz to lo naa. Ib zanaid naa min co, sac rley naa znu quiayazhd naa quiayun naa xtsiin Jesús, mazd maase guetgbin naa, ledle ctiche zho guielbley rii lo naa. <sup>16</sup> Niicle ne znu quiayazhd naa quiayun naa dзиin rii, per ni lalnu racniatsd naa, sacne ible laa Dios bzo naa par gne naa Xtiidz me lo miech; ni, jprobsaxe naa telne gned naaw! <sup>17</sup> Noyund naaw par dien pe premio ygaa naa, sac zig rne naa ga Dios bzo naa, me rnabey naa quiayun naaw, masaque nacse naa zig tib ngundziin. <sup>18</sup> Par naa, leele premio nu nac guielbley rii ne znu liga quiaseed naa miech Xtiidz Dios, rnabd naa gneedzpaazho ncuane yquiiin naa niicle ne ragual naa gnab naaw.

### *Tsoxco zho ygaa zho premio*

<sup>19</sup> Stiba mazdragaa wena, znu choot noneedz ncuane yquiiin naa, sac sca grieelod cho gnabey naa; per niicle ne nagon choot rnabeyd naa, zhaal naa rac naa zig tib ngundziin lo grëse miech, parne gdeeda diidz tso guic zho sëëb zho xnëz Jesús. <sup>20</sup> Gacxe waa zeene no naa lo grë zha Israel, rac naa zigne rac zho, zeena tso guic zho gliladz zho cho nac Jesús. Zeene nogaa naa lo grë zha ne zianal xley zha Israel, niicle ne rnalodraa naa ley, per run naa grë ley ne zianal zho, zeena sca grieelo yquiablazd zho sëëb zho xnëz Jesús. <sup>21</sup> Scaquegaa zeene no naa lo grë zha ne runbeyd ley co, rioxco naa rac naa zig tib zha ne runbeyda;

per guiabd ne togo haxta grë ncuuane rleyniedraa Dios run naa. Laa naa run min co, zeena ye zho sëeb xnëz Jesús.

<sup>22</sup> Grë zha ne pense quiayacnan zha nac Xtiidz Dios, zeene no naa lo zho, rund naa gne naa grë ncuuane gard guien zho zha nac, rund naa csanwin naa zho, sac mine rioxco naa lozh gliladz zho cho nac Dios. Tib tib miech, rguib naa rac naa zigne rac zho, parne grieelo gzodiidz naa lo zho cho nac Jesús, zeena gacnan zho zha sëeb zho xnëz Dios. <sup>23</sup> Laa naa run min co, parne gdeeda diidz gnee naa Xtiidz Dios grëse lo miech, ni scagaa, gley naa gan naa ye zho ygaa lo guielndzon ne zhobnee lo Xtiidz Dios.

<sup>24</sup> Nanle to ganle zha rzac zha ne rie tib lo corr, nzian zho nac zha ne rie per tibaque zha ne run gan, zha co rcaa tib premio. Golgun cuent nasca tib lo corr i no to, grëse to goltsoxco xoon to zeena grëse to ygaa tib premio. <sup>25</sup> Grë zha ne sca rio tib lo wguib, par grieelo gun zho gan rioxco zho ran zho xcuerp zho, rund zho ncuuane csiaab xfuers zho. Nroob cuidad ne rap zho zho par gun zho gan tib coron guizh nguia ne znuse rgool. Scase nac premio ne rgaa zho, sangue ne gon, laa ne noxco ygaa ne tib premio ne gdzind dze nitlo. <sup>26</sup> Gacxe waa, tel naa tibaque noxco naa dien zha xoonraa naa. Nanpaa naa pa gdzin naa, nacd naa zig zha ne riend dien pa gdzin, zha ne lega rquiaagaa puñet, rdeete zhow zaatne no ygaaw. <sup>27</sup> Ni lalnu rdete naa diidz gac mine racladztaa xcuerp naa, tibaque rnabey naaw parne guiena ncuuane nonguiel min co none guna, led gunda ncuuane racladztaaw. Laa naa run min co zeena gun naa gan, sac gon, guieltodox ga grieequia naa znu no naa none naa lo miech zha gun zho, ni tel lozh ga naapaze biaan bend naa gan.

## 10

*Nodne gleynie miech mdio*

<sup>1</sup> Bets, bzian, go|soladz ganle zha bzhaac grë pxozgol ne zha ne sca bzënie Moisés ga. Pxeel Dios tib xcow been ncal zaatne zieetaa zho, ni pteed me zho lo Nisdoo Nizhnie. <sup>2</sup> Zigtaa lo xcow cow, zigtaa lo nisdoo cow, masaque rrieequia lo co brobnis zho, parne tibaque niac zho niacnie zho Moisés.

<sup>3</sup> Grëse zho gon milagr nroob ne been Dios, bnabey me bliaal quietxtil zhan gbaa bdeed me dow zho, <sup>4</sup> beencta me nis tib cho quie bdeed me go zho no zho dan bidz co. Lëële Jesús ga bdeed nis co go zho. Lo zho ga zo me, rrieequia me ga nac quie ne bda nis go zho, sac mese rzhixcuaa lo grëtaa xliaadz miech. <sup>5</sup> Niicle scataa gon Dios zho, per led grëd zho bioxco nion xtiidz me, nacne ndal zho bnitlo bioliuse zho dan co. <sup>6</sup> Gase na ganle gotsaa gwi ne zha bzhaac zho, zeena gzoobladd ne dziuun ne grë ncuaañe ndzinlid ne been zho. <sup>7</sup> Golguien gleyñiede to mdio, zigne been zho. Rnee lo Xtiidz Dios: “Blozhse dow zho, go zho, laa zho psilo biee lo zhimdio zho.”

<sup>8</sup> Gotsaa gwi ne ganle, pe guielnë ne bgaa zho zeene brieequia bla zho lega bionie wnaa, tib dzeque bnabey Dios gut galptson mil zho. ¡Ni lalnu tsod guic to gun to min co! <sup>9</sup> Ib gunglëede to Dios, sac zha, zeene benngulëe zho me, bnabey me brieequia grë meel pquiaa maw zho, ndal zho gut. <sup>10</sup> Niicle glisquidgaa to tel pe nac mine quiayun me, sac tel zha, sca been palal zho; nacne pxeelaque me anjl ne rnitlo, ndal zho bnitlo anjl co. <sup>11</sup> Sca nagon bzhaac grë pxoz gol ne ga, gotsaa guien ne sca dziuund ne mine been zho, mine been zho ga laaw zhobnee lo Xtiidz Dios parne gacndion new, guien ne zaacse gban ne, ne nac ne miech ne mban len dze rii ne znu ziaadyoble nitlo guidzliu.

<sup>12</sup> Gacxe waa, zha ne rzac mbanpaa zho zigne racladz Dios, none nsin so zho zeena gund zho ncuaañe gunctal

xtol zho. <sup>13</sup> Nli no ncuuane rcheep ne gunctal ne xtol ne, per nacda ncuuane griin rien. Pe zhidaa miech ne zieded lo min co. Tsod mine guiab ne ib lebd ne griee ne lo. Mine naca none gnalo ne Dios, sac tel me ib csaand me guiab ne tib lo ncuuane glëbd ne griee ne; sca nac xtiidz me, ni mesi gon ctsëed me mine rnee me. Me nac men ne gacnien ne grieelo griee ne low.

<sup>14</sup> Bets, bzian, golguien sca ib none csaan to grë mdio, gnalodraa tow. <sup>15</sup> Miech nixbiini nac to, grë mine rne naa lo to nu, nan to ganle ncuuane rquiina. <sup>16</sup> Golwi ganle, zeene rdioow ne guietxtil, rdio ne vin, rdziuun ne xtsee ne been Jesús ga, ga rlu tipse nac ne grë ne nacie ne me. <sup>17</sup> Niicle ne ndal nac ne, per ne tibaque guietxtil ne rdioow ne, min co gane tibaque cuerp nac ne grë ne, ni lëë xcuerp Jesús ga. <sup>18</sup> Scaque zha Israel, zeene row zho xpëel ma ne riogon lo Dios, ga rlu zho ne nacie zho me.

<sup>19</sup> Zha ne rnologaa mdio, zeene row zho grë ncuuane riogon lo mdio, scaque tibaque rac zho grë zho mdio. Per guiabde to togo mban mdio, togo mazdragaa nac bëel ne rgogon zho lo mdio. <sup>20</sup> Mine racladz naa guien to, zeene sca run grë miech pe rgogon zho lo grë mdio, lo mendox ga rgogon zhow, led lo Diosda. Golguien sca, ib tsiesëbde to lo grë zha ne quiayownie mdio, zeena gacniede to mendox. <sup>21</sup> Lëdraaw ga gon gun to, tel rlozhse rquiin to xtsee ne psan Jesús diidz ga dziuun ne, ni tsieque to tsieguie to, tsietow to zaatne rownie zho mendox. <sup>22</sup> ¡Guncade to, gunglëede to Dios! ¡Golguien ganle, lebd ne dzian ne xquie!blëe me!

*Zha gun zha ne rliladze Jesús*

<sup>23</sup> Zig rne naa ga: “Nli zac gun ne ncuuane gacladztaa ne, per led grëda nonguiel.” Tel naa, zrieelo gun naa ncuuane gacladztaa naa, per led grëda yquuin par gun naa



xyudar grëraa zha bets ne, lozh tsoguic zho Xtiidz Dios; <sup>24</sup> sac gon, ib none dzioxco ne grëraa zha ne nacgrë ne. <sup>25</sup> Zig nac grë bëël ne rdo lo lgui, zac gow tow, ib gunde to gnabdiidz to dien zha naca, sac gon nend bëël ne biogon lo mdiow, dzigo laa dzeb co tsonie guic to. <sup>26</sup> Golguien ganle, Dios psan guidzliu, scagaa grëtaa ncuaane no low chen me naca.

<sup>27</sup> Zeene tel zha tsiegaa to tib wagw lidz tib zha ne gard gliladz Jesús, bëël ne gneedztaa zho golgowa, per scaque gnabdiidzde to dien zha naca; zeena peet dzeb tsonied zdo to. <sup>28</sup> Per telne grieequia tib zha ne gnë bëël ne biogon lo mdiow, gowde tow; zeena csande to zdo zho. <sup>29</sup> Niicle ne ndionpaa ne led dold ga gun to gow tow, per zha ne gana ga sadol zdo zho.

Nana gnë to: “¿Pe nac dzigo por stib zho grieelod gun naa mine racladz naa? <sup>30</sup> Tel rded naa xquizh lo Dios zeene pe tib guielwagw ne rquiin naa, ¿pe nac dzigo por mine rzacse stib zho, grieelod gow naaw?” <sup>31</sup> Golguien ganle, racda por zha cose; sac grëse ncuaane dziuun ne, haxta ncuaane dioow new, ncuaane dio new, none zeene nodziuun new cxobnen ne ganle pa lotaa men nroob nac Dios. <sup>32</sup> Gotsaa guien ne sca ganle dziuund ne ncuaane yquiaaqui csan ne zdo stib miech, zigtaa zha Israela, zha stib guiedza, zha ne nolegaa xnëz Diosa. <sup>33</sup> Tel naa, zanaid naa ncuaane gdziladz naa naase, sinque rioxco naa grëtaa ncuaane run naa, run naaw par gacnie naa grëse miech, zeena grieelo tso guic zho gnab zho lo Dios csilaa me zho lo xtol zho.

## 11

<sup>1</sup> Golwi sca, zigne ran to noxco naa mban naa zigne blu Jesús, scaquegaa to goltsoxco gban to zigne ran to mban naa.

<sup>2</sup> Bets, bzian, rleyne naa to gon sac tibaque rsoladz to naa, ni rioxco to zienal to grë mine pseed naa to. <sup>3</sup> Per golsoladz ganle: grëse men wnaa, none zha bgui gnabey lo zho, tel zha bgui Jesús rnabey lo zho, zigne rnabey Dios lo me. <sup>4</sup> Gacxe waa, tel tib zha bgui yase nozodiidznie zho Dios, quiateedgaa zho xtiidz me, ni zob xombrel zho; xquielto Jesús ga rbee zho. <sup>5</sup> Scagaa men wnaa, tel zhoobd bay guic zho ni zo zho nozodiidznie zho Dios, quiateedgaa zho xtiidz me, xquielto mgui ga rbee zho; sac ga rlu zho rond zho mine rnabey mgui. <sup>6</sup> Telne racladzdga zho gdze lad guic zho, mazd gnabey zho chug guitsguic zho. Laa telne rtoladz zho chuga, rtoladz zho gacruxa, dzigo mazd cxobguic zho xpay zho.

<sup>7</sup> Grë zha bgui, nod pe nacne gdze lad guic zho, sac choot samiech guidzliu zho rnabeyd lo zho. Zeene bzaa Dios mgui, bzaa me zho zigne nac me, zeena glu zho ganle pa lotaa men non nac me; scagaa wnaa, laa wnaa biaan par glu zho ganle non mgui. <sup>8</sup> Gotsaa gwi ne ganle, letxe xcuxtid wnaa waa biao mgui, sinque xcuxti mgui brie biao wnaa. <sup>9</sup> Stiba, zeene psan Dios wnaa, ib laa me psan zho par gacnie zho mgui. <sup>10</sup> Gacxe nagon waa ib none gdze lad guic wnaa, zeena glu ganle nguzobdiidz zho lo zha ne rnabey zho; haxta grë anjl ne no gbaa zley zho gan zho min co.

<sup>11</sup> Per guiabde to togo peet nond wnaa, golsoladz ganle psanle Dios diidz zigtaa mguiw, zigtaa wnaaw rquiinsa zho; sac telne guiend wnaa guiend mgui, telne guiendgaa mgui guiend wnaa. <sup>12</sup> Gotsaa gwi ne ganle, zeene biao wnaa cho mgui brie dzit ne biao wnaa, per zeene laa wnaa biaan, haxta lo nadze wnaale rzo mgui; zigtaa mguiw, zigtaa wnaaw Dios psan zho grop zho. <sup>13</sup> ¿To nadien zha rzac to? ¿Pe nli nonguiela gdze lad guic wnaa zeene nonab zho lo Dios, te nonguielda ye? <sup>14</sup> Golwi ganle

ib no gdze guic wnaa, biaanle zho roob guits guic zho parne ctsew lad guic zho; <sup>15</sup> tel zha, haxta rleynie zhow zeene scataa noola, sangue ne nac ne zha bgui, guieltow ga guiool guitsguic ne. <sup>16</sup> Tel nogaa zha ne rzac led scada, maase gnee zho. Per ible znu gon noseed no miech, ni grëragaa zha ne rliladzle Xtiidz Dios, rien zho ne nli scaw.

*Zha none gac xtsee ne psan Jesús*

<sup>17</sup> Bets, bzian, ne nligaa rley naa tibaque rsoladz to naa, per bin naa zeene rcaalsa to row to xtsee ne psan Jesús diidz, laa ne gley to ycaalsa to, lel quiayunctal to xtol to. Mincoosi nagon ni lalnu riold zdoon naaw. <sup>18</sup> Ziyon naa gzobtaa zeene rcaalsa to, pe na tsiegald tilidiidz to, laa ne tipse gac to lel rlëëlsa to. Ni rgobey naa nli scaw. <sup>19</sup> Rien naa masaque rzac to ible sca none gac to, parne glupaa cho nac zha ne non xtiidz, zeena guiannziuu zho lo miech.

<sup>20</sup> Led zhixtseedraa Jesús i gon run to. <sup>21</sup> Sac ron naa zeene laa to row, masaque lëëled rac to row to ncuaane zienie to, ib rwide to no zha ne rdzin ga quianied zho nroob ncuaane gow zho. Squi rzob to rowcho to, haxta rzudz to; laa zha mbanse rac zho grielod gow zho ncuaane row to. <sup>22</sup> ¿Mod guiend lidz to, ga sob to gow to, guie to haxta zaatne guieltaa to, led node to runctoladz to zha ne squi guiend pe yquiin? I gon rlu to rleyniede to grë zha ne no xnëz Dios. ¡Ni palal gon rdziguiend naa ncuaane noyun to!

<sup>23</sup> Golsoladz ganle zha nac ne laa xtsee rii biaan, Jesús psan diidz gaca, sca gocnan naaw ni scagaa biallu naaw lo to. Wdze ne bnaaz zho Jesús ga, zeene blozh dowxtseenie me xpëëdscuel me, bzhen me tib quietxtil, bdeed me xquizh lo Dios; <sup>24</sup> blozhse bdeed me xquizh, nzian lë been me quietxtil co, bdeed mew lo zho rëb me: “Golquiina, rriequia lëë xcuerp naa nu, sac gon znu gun zho xcuerp

naa parne csilaa naa to grë to. Golgun xtsee rii, parne glu to ganle tibaque rsoladz to naa.”

<sup>25</sup> Blozh ga, scaque bzhen me tib cop no vin, rëb me lo zho: “Lëë stib trat cub nu gon riaan Dios grë me miech, rriequia xchen naa nu nac vin rii, ren ne tso sell trat co par glu nona. Gzataa zeene znu guie to vin, golsoladz ganle zha naca.”

<sup>26</sup> Golguien sca, zeene guntaa to xtsee co zaacse golguna, sac gon, ga quiaxobnen to lo miech Jesús nac men ne gut xcuent to, psilaa me to. Tibaque none gun to xtsee co, haxta gdzin dze ne laa me guiaad stib.

<sup>27</sup> Gacxe waa, zha ne rienewguit guic rquiind zho xtsee co zigne no yquiin zhow, dol nroob ga run zho, xcuerp Jesús ga, xchen me ga noguitnie zho. <sup>28</sup> Zeene gun to xtsee co, none wen wen sob to ganle zha naca, pe nacne laaw rac, dzigo lozh ga zac yquiin tow. <sup>29</sup> Sac gon zha ne lega gow guietxtil co, lega guie zho vin co, sac zhow zig beelze pe xtsee; rriequia guielne ne yгаа zho ga gow zho, guielne co ga guie zho. <sup>30</sup> Mincocxe waa, blactaa zha ne nacgrë to i quiayaan nsis, nogaa zho rzacnele, haxta nzian zho gutle. <sup>31</sup> Telne niaca mine wen wen gwi ne ganle zha nac xtsee co, tsod pe nacne pe guielne ne cxeel Dios dzian ne. <sup>32</sup> Ni zeene scagaa rteed me ne tib caxtigw, laaw run me parne tsa ne biini gbiire gbig ne lo me, zeena led yed ne nitlo gal dze ne nitlo grëraa miech ne ziana ncuane lo guidzliu rii. <sup>33</sup> Bets, bzian, golguien sca zeene ycaalsa to gun to xtsee co, golcuëz grëraa zha ne nacgrë to dzigo tipse golsilo golquiina. <sup>34</sup> Tel zha ne riengaa leb d zho lozh gdzin grëraa zha ne nacgrë zho, mazd gowgazh zho lidz zho, zeena yguibd zho yгаа zho guielne co.

No spalal mine racladz naa gacnan to, per naa zeene gual naa nëz qui dzigo gne naaw lo to.

## 12

*Guie*lbiini ne rdeed Espíritu Sant

<sup>1</sup> Bets, bzian, nugaa na ganle laa naa gzet zha nac guie*l*biini ne rneedz Espíritu Sant, sac racladz naa wen wen guie*n* to zha naca. <sup>2</sup> Rsoladz to ganle zeene gard gliladz to Xtiidz Dios, nêzrii nêzrec bio to güeyga*n* to stib stib grê mdio, ncuaa*n*e ni tib lan diidz rneed; sangue Dios ne rliladz to niina, led scad nac me. <sup>3</sup> Per nsin golso die*n* cho nac zha ne noteedpaa xtiidz me, sac nzian zha ne rnee xtiidz Espíritu Sant noteed zho lo miech, per tel*r*o zho rdzibdee zho Jesús, ga rlu rquidie zho. Sac zha ne nli nacie Espíritu Sant, rdzibdeed zho Jesús, sinque rlu zho ne me rnabey zho, ni haxta dib zdoo zho rnee zhow.

<sup>4</sup> Tib tib zha ne rliladz Jesús, zhaase zhaase nac guie*l*biini ne rgaa zho, per tibaque me*n* ne rdeeda, lëë me*n* co nac Espíritu Sant. <sup>5</sup> Nzian mod zrieelo dziuu*n* ne dziin lo Jesús, per grêse ne me rnabey ne. <sup>6</sup> Tib tib ne zhaase zhaase mod ne rlu Dios nacie me ne, per grêse ne me nac me*n* ne rlu zha dziuu*n* ne xtsi*n* me.

<sup>7</sup> Guie*l*biini ne rneedz Espíritu Sant lo ne tib tib ne, laaw rneedz me parne dziuu*n*lsa ne xyudar grê zha ne nacgrê ne gacndionraa ne zha racladz Dios.

<sup>8</sup> No lo zho rdeed me guie*l*biini rien*n* zho zha cso zho diidz lo miech,

no lo zho rdeed me guie*l*biini rseed zho grê ncuaa*n*e nga*n* ni rlu zhow lo miech.

<sup>9</sup> No lo zho rdeed me guie*l*biini dib zdoo zho rnalo zho Dios, niicle ncuaa*n*e mazdraa nga*n* rnab zho lo me, raca.

No lo zho rdeed me guie*l*biini zeene rnab zho lo Dios, riac grê me*n* rzacnë.

<sup>10</sup> No lo zho rdeed me guie*l*biini rnab zho lo Dios rac grê milagr,

no lo zho rdeed me guielbiini rteed zho xtiidz Dios lo miech,

no lo zho rdeed me guielbiini rien zho cho nac zha ne nlipaa nacie me, cho zhagaa nacie mendox.

No lo zho rdeed me guielbiini rnee zho stib diidz ne gard cseed zho,

no lo zho rdeed me guielbiini rien zho pe rnee zha ne rnee diidz co, dzigo rnee zhow.

<sup>11</sup> Grëse guielbiini, Espíritu Sant rdeeda, ni me nan pa mine rneedz me lo ne tib tib ne. <sup>12</sup> Lo grëse ne ne nac ne zha ne no xnëz Jesús, rrieequia xcuerp me nac ne. Tel cuerp, niicle ne nzian part niaaw, per tibaque naca. <sup>13</sup> Ndal miech ne nac xcuerp me, no zho nac zha Israel, no zho nac zha zit, lo grë zho no zho ngadoo lo ben, nogaa zho zonlaa, per grëse ne tibaque Espíritu ne nacie ne, sac tibaque Espíritu bгаа ne zeene brobnis ne.

<sup>14</sup> Gotsaa gwi ne ganle, no ni ne, no nia ne, no diag ne, nzian lë niaa xcuerp ne, per tibaque naca. <sup>15</sup> Gacxe waa telne niaca mine rnee ni ne, grieelod guiaba porne nacda nia ne, nacda xcuerp ne. <sup>16</sup> Scaque diag ne, grieelod guiaba porne nacda bziaalo ne led yedraaw nac xcuerp ne.

<sup>17</sup> Sac telne niaca mine gdipse xcuerp ne niaa bziaalo ne, ¿zha nadien gon ne? Telne gdipsegaa xcuerp ne niaa diag ne, ¿zha gzoobzhi ne? <sup>18</sup> Lëëzhe wen led scad psan Dios xcuerp ne, sinque grëse part ne niaaw bzaa mew zigne gocladz me, psanse mew zaatne rquiina tib tiba. <sup>19</sup> Sac telne tipse niaa grëse part ne nac xcuerp ne, ¿zhazhe rlu ncuuan co!

<sup>20</sup> Gocda sca, sinque zhaase zhaase nac tib tib part co, per grësew tibaque cuerp naca. <sup>21</sup> Gacxe waa grieelod guiab bziaalo ne lo nia ne: “Ib rquiind naa luu”; guiaabgaa guic ne lo ni ne: “Ni lalnu rquiind naa to.”

<sup>22</sup> Grëse part ne niaa xcuerp ne nose zaatne rquiina, haxta mine mazdraa nda lëë min co rquiinraa.

<sup>23</sup> Stiba, no part ne niaa xcuerp ne rzac ne zhi nona, no part haxta rtoladznie ne, per gotsaa gwi ne ganle part co nac zaatne ranraa ne, rioxcoraa ne rdze; <sup>24</sup> sangue part ne nziuu lo ne, zienied guic ne dien zha gdzew. Ible sca psan Dios xcuerp ne, zeena sca gacnon part ne rzac ne zhi non. <sup>25</sup> Sca niaa xcuerp ne, grëse part ne niaaw rquiinlsaw xcompañera; led yeda rtsolsa. <sup>26</sup> Golwi ganle, zeene nē tib part xcuerp ne, grëse part ne niaaraaw zienie nē co; scaquegaa zeene rdioon tib part co grësew zienie guielbley co.

<sup>27</sup> Laa naa rne miñ rii lo to, sac racladz naa guien to sca none tipse gac to. Golguien ganle xcuerp Jesús i nac to grē to, tib tib part ne niaa cuerp co i nac to, rquiinlsa to zha ne nacgrē to. <sup>28</sup> Ni zigne sca tib tib part ne niaa cuerp nose zaatne rquiina, scaquegaa grëse zha ne no xnēz me, bzose Dios zho pe nac dziin ne gun zho:  
 no zho rienee xtiidz me lo miech,  
 no zho rteed xtiidz me lo miech,  
 no zho rseed miech xtiidz me,  
 no zho rnab lo me rac grē milagr nroob,  
 no zho rnab lo me riac men rzacnē,  
 no zho rioxco run xyudar grē miech,  
 no zho rzo rac zho zha rnabey,  
 nogaa zho rnee grē diidz ne gard cseed zho.

<sup>29</sup> Golgan ganle, psod me zho grëse zho tsienee xtiidz me lo miech, grëse zho cteed xtiidz me, grëse zho cseed miech xtiidz me, grësegaa zho gnab gac milagr. <sup>30</sup> Niicle psodgaa me zho grëse zho gnab guiac men rzacnē, grëse zho gnee stib diidz, grësegaa zho gnee zha nac grē diidz co. <sup>31</sup> Zhaase zhaase nac guielbiini ne rgaa tib tib zha ne no xnēz me, per goltsoxco yгаа to guielbiini ne mazdraa rquiin.

Sca nagon naca, per golquiaadiaga ganle, nu laa naa gzet lo to stib miñe mazdraa non lo grē guielbiini rii.

## 13

*Guielwleynie*

<sup>1</sup> Miñe mazdraa rquiin gon nac ne gleyne ne samiech ne. Teļ niaca miñe bgaa naa guielbiini rne naa grë lose diidz ne rnee miech, haxta grë diidz ne rnee xanjł Dios rne naa, ni teļ rleyñied naa samiech naa, ĵpa dien rquiin rac naa grëtaa diidz co? Rrieequia nac naa ga zig tib lë guiib ne loxaque rzedz.

<sup>2</sup> Teļ niaca miñe rteed naa xtiidz Dios lo miech, rien naa pe nac miñe naraa cxobneñ me, grëse wseed ne no rien naa, ni rleyñied naa samiech naa, ĵpaat rquiinda! Teļ dib zdoogaa naa rnalo naa Dios, haxta ncuaane mazdraa ngan rñab naa ruñ mew, ni rleyñied naa samiech naa, ĵpeet nonda!

<sup>3</sup> Teļ quiizgaa naa grë ncuaane quianie naa lo grë zha ne guiend pe yquiin, haxta gded naa naa tsec naa, per teļ rleyñied naa samiech naa, ĵzhlëse ga gun naa min co!

<sup>4</sup> Sac gon zha ne nli mban zigne nac guielwleynie co:  
 rieedñied zho samiech zho,  
 wen rac zho lo samiech zho,  
 racnëd zdoo zho, niicle ran zho wenraa noded stib miech lo zho,  
 ruñd zho ne lëëque zha gunnon zho,  
 racniatsd zho lo samiech zho,

<sup>5</sup> ruñd zho ncuaane coguielnë zho, gunglëëgaa zho samiech zho,  
 zienałd zho ne tebaa lose zho yquiin grë pe cos,  
 nacd zho zha ne lega zolëë,  
 rapguielnëd zho samiech zho,

<sup>6</sup> ni lalnu riod zdoo zho miñe ruñ zha ne rsacsi samiech, miñe rleyne zho nac diidzli.

<sup>7</sup> Zha ne nli rleyne samiech, ni lalnu peet grieelod yca gleyne zho zho; rquiaadiag zho miñe rnee zha co,



rzhidznied zho zho; tibaque rquiabladz zho wen greequia zho, rsaand zho zho, tibaque racnie zho zho.

<sup>8</sup> Zdziñ dze yquiindraa cho cteed xtiidz Dios lo miech, yquiindraa gnee zho stib diidz, yquiindraa grë guielrac, sangue guielwleynie gdzind dze ne nitlow. <sup>9</sup> Niicle ne nogaa ne guielbiini ne rneedz Espíritu Sant, niicle no zha ne rien zha gnee zho Xtiidz Dios lo miech, per palalse nac ncuaane rien ne niina. <sup>10</sup> Sangue gal dze ne laa Dios lozh gzhixcuaa ne zigne no gac ne, grëse guielbiini ne rdziaap ne niina, paat yquiindraaw.

<sup>11</sup> Masaque nac ne niina zig tib mëédlas. Tel naa, zeene goc naa mëédlas grëse ncuaane bne naa, grëse ncuaane bien naa, grëse ncuaane pseed naa, grëse ncuaan co ben naaw zigne run grëraa mëédlas. Per zeene laa naa broob, laa naa biao biini, grëse ncuaan co laa naa bienpaa zha naca; laa guielmëédlas co bded. <sup>12</sup> Scadaa nagon rziaac ne niina, palalse rien ne zha nac Dios, rriequia rdzianse ne me niina zigne ran ne zhimlë ne lo beelze pe tib lë vidr; per zdziñ dze laa ne dzianlo me zigne nacpaa me. Palalse ndion ne niina zha nac me, palalse rsilo rdzian ne me, per gal dze co laa ne dziuunbeypaa me zigne runbey me ne niina, nanpaa me zha nac zdoo ne tib tib ne.

<sup>13</sup> Golgacnan sca ganle, grë guielbiini co zdziñ dze ne yquiindraaw, sangue ne znu: dib zdoo ne rnalo ne Dios, noniepaa guic ne zac mine rnee me, ni rleynie ne samiech ne, lozhda. Per lo gza tsona nagon, guielwleynie co nac mine gdzind dze ne gdzëë.

## 14

### *Zha ne rnee stib diidz*

<sup>1</sup> Laa to nanle pa min nac mine mazdraa non, jgolleynie samiech to sca! Per scagaa golnab ygaa to guielbiini ne rneedz Espíritu Sant. Zig nac guielbiini ne rgaa zha ne

rteed xtiidz Dios lo miech, golnab yгаа to min co zeena sca grieelo cseed to miech xtiidz me.

<sup>2</sup> Sac tel zha ne rgaa guielbiini rnee zho stib diidz, zeene rnee zho diidz co choot riend dien pew, sac lo Dios ga rnee zho. Tel pe nac mine rnee zho ga, Espiritu Sant rsiaba guic zho, per choot racnand dien zha naca. <sup>3</sup> Sangue zha ne rgaa guielbiini rteed zho xtiidz Dios lo miech, mine rnee zho ga rquiina par tsogucraa miech zha racladz me, par guien zho pe nonguiel gun zho, ni rchoobladza zdo zho.

<sup>4</sup> Tib zha ne sca rnee stib diidz, lose zho rquiin guielbiini co, sac zhase riogucraa zha racladz Dios; sangue zha ne rteed xtiidz me, diidz ne rnee zho rquiina lo greraa zha ne no xnöz me, gröse zho riogucraa zha racladz me. <sup>5</sup> Wena tebaa gröse to yгаа guielbiini co gnee to stib diidz, per mazdraa gon wena cteed to xtiidz Dios lo miech, cseed to miech xtiidz me; sac min co mazdraa rquiin, ledle gnee to stib diidz. Zacaqueгаа gnee to stib diidz co, totsaque lozhse gnee tow, gneegazhaque to dien zha naca; zeena sca yquiina lo greraa zha ne no xnöz Dios. <sup>6</sup> Bets, bzian, to gase nadien, tel niaca mine glanso naa lo to i csilo naa gne naa stib diidz, ¿pa dien yquiina lo to? Per tel glanso naa, ine csilo naa clar gne naa lo to pe nac mine zinee Dios lo naa, pe nac grē mine rien naa, pe nac mine ziaadyob gac, zha nac grē mine zhobnee lo Xtiidz Dios, led gröse min co zien to zha naca, ni squiina lo to gröse to.

<sup>7</sup> Haxta grē ncuane rool miech, zig nac bzie zig nacгаа vihuel, tel csilo zha ne noyoola tel zhataa gool zhow, ¿zha dien guien miech pa di noyool zho? <sup>8</sup> Zig nacгаа zha ne rcuedz cornet lo menguiib, telne tel zhataa ycuedz zhow, ¿zha dien gacan menguiib pe nac vis ne quiayun zho? <sup>9</sup> Scadaa nagon run to zeene rnee to stib diidz lo miech, ¿zha nadien guien zho pe nonee to? Rriequia lo mese ga

rnee to. <sup>10</sup> Zig nac lo guidzliu ndal lo diidz rnee miech, per tib tiba nose mod ne rnee zhow, nose zha ne riena. <sup>11</sup> Telne guiaad tib zho lo naa csilo zho gnee zho, ni rienḁ naa pe quianee zho, grieelod guienḁ naa pe racladz zho, guiengaa zho zha rzaac naa.

<sup>12</sup> Nana sca, zha ne rquiabladz ygaa guielḁiini ne rneedz Espḁritu Sant, gnab zho ygaa zho miḁe grieelo yquiin lo grḁraa zha ne nacgrḁ zho, zeena grḁ zho tsoguc zha racladz Dios gban zho. <sup>13</sup> Gacxe nagonḁ waa, zha ne rneele stib diidz, none gnab zho gdeed Espḁritu Sant guielḁiini lo zho guienḁ zho pe nac grḁ diidz co, parne gnee zhow lo miech; <sup>14</sup> sac zha ne sca rnee stib diidz, tel so zho gnab zho lo Dios, rienḁ zho pe nonab zho, loxaque zhiespḁrituse zho quianee ga. <sup>15</sup> Gacxe waa zeene gnab ne lo Dios, zeene goolḁniegaa ne me, zac gnee ne stib diidz, per scagaa none gnee ne diidz ne rienḁ ne, miḁe rienḁgaa grḁraa miech. <sup>16</sup> Sac gonḁ tel stib diidz nonee ne noyoolḁnie ne Dios, nodeed ne xquizh lo me, ¿zha dienḁ yquiab grḁraa zha ne ndxie ni rienḁ zho pe rnee ne? <sup>17</sup> Niicle ne ndzon sca nodeed ne xquizh lo Dios, per zha ne noquiaadiaga ga, paat yquiinda lo zho.

<sup>18</sup> Xquizh Dios, tel naa ye naa rne stib diidz, ni mazdraa gonḁ rne naaw que zha ne rneew lo to i, <sup>19</sup> per zeene zo naa zaatne ndxie grḁ zha ne noquiaadiag Xtiidz Dios rund naa ne gnee naa stib diidz, sinque rne naa miḁe guienḁ zho. Rienḁ naa wenraaw gne naa maase gaayaque lan diidz, per miḁe guienḁ zho, lḁdle so naa gne naa tsii mil diidz, ncuaane ni tib choot guienḁ.

<sup>20</sup> Bets, bzian, golḁuienḁ sca golḁsaan guielḁmḁḁdlas qui. Zacgaa gac to mḁḁdlas per nḁz lo guielḁntseeba, sangue xpensar to golgac zig zha ne baa biinile.

<sup>21</sup> Gotsaa gwi ne ganḁle zha nac stib diidz. Zhobnee lo Xtiidz Dios rḁb me, laa me cxeelḁ miech stib dan miech

ne rnee stib diidz, par gnee zho lo zha Israel; per niicle tsienee zha co, ib guiend zhow. <sup>22</sup> Gase naganle rlu rquiind stib diidz co par grè zha ne rnalole Dios, sinque laaw rquiin parne grè zha ne nod xnèz me gan zho ganle nli no me. Zha ne nole xnèz me, zha co rquiin gon zho pe nac mine racladz me gacnan zho, pe nac mine zhobnee lo Xtiidz me. <sup>23</sup> Per niicle scaw, telne zob bla zha ne sca gard gliladz Xtiidz me, zobgaa bla zha ne pense rsilo rquiaadiaga, ni csilo to gnee to stib diidz, zeene gan zhow lèètaa mine guiab zho rzhinle guic to sca rac to. <sup>24</sup> Laa telne grèse to no noteed to xtiidz me, nonee to mine racladz me gacnan miech, zha ne sca gard gliladz Xtiidz me, zha ne sca pense rsilo rquiaadiaga, zeene gon zho grètaa mine nonee to, haxta ziaa zho biini zien zho ne nli tib miech ngoopdol nac zho. <sup>25</sup> Zigse quianee to laa zdoo zho lozh yguudz, laa zho ted yquitsgzhìb zho gnab zho perdon lo Dios; ga guien zho ganle ne nli nacie me to.

<sup>26</sup> Bets, bzian, golguien sca zeene ycaalsa to cseed to Xtiidz Dios, zigtaa zha ne goola, zha ne cteed xtiidz Diosa, zha ne gnee stib diidza, zha ne gneegaa zha nac diidz co, none tsienie guic zho mine gun zho ga laaw yquiin parne tsoguicraa los demas zho zha racladz Dios gban zho. <sup>27</sup> Zeene gnee zho stib diidz, none choptaa zho, tsontagaa zho gneew. None tibga zho gnee, ni rquiin zole zha ne gnee pe nac diidz co. <sup>28</sup> Laa telne guiend zha ne grieelo gnee dien pe naca, nodne gnee zhow; mazd len zdoose zho gnee zhow, Diosse gon pe nonee zho.

<sup>29-30</sup> Scaque zha ne cteed xtiidz Dios, choptaa zho, tsontagaa zho gneew, laa grèraa zha ne ndxie none yquiaadiag zho mine nonee zho. Telne lèètaaque nonee tib zho, ni csiaab Dios guic stib zho gnee, dzigo none cuèz zha ne quianeele ga zeena grieelo gnee zha co. <sup>31</sup> Sca none gaca, none tibga tibga zho gnee, zeena grèse zha

ne ndxie grieelo gon zho dien pew, parne cseed zho, ni gacnguieelraa zho lo Xtiidz Dios.

<sup>32</sup> Zha ne sca rteed xtiidz Dios, none cseed zho gnabey zho zho, cuëz zho nieeda gdziñ hor ne gnee zho. <sup>33</sup> Sac tel Dios, rdziladzd me guiots gnaaz pe cos, rdziladzd me ncuaañe nzhiitni. Miñe rdziladz me zaacse gac tib cos, ni scagaa run grëraa zha ne no xnëz me.

<sup>34</sup> Ni stiba, zeene sca rcaalsa to, racladz naa guien grë men wnaa dzese sob zho. Nodne so zho ye zho gnee, sac gon mgui rnabey zigne zhobneeque lo Xtiidz Dios.

<sup>35</sup> Ncuaañe racladz zho gacnañ zho, ro yu ga gnabdiidz zhow lo zha bgui, sac gon, rdzieelda lëëpaaze wnaa gnee zaatne rcaalsa to rquiaadiag to Xtiidz Dios. <sup>36</sup> Zaacse sca golgac, golguien ganle grieelod gun to miñe notaa guic to, sac gon led loxaque todse nac zha ne runbey Xtiidz Dios, par guiab to zigne racladz to gac tib cos, sca none gaca.

<sup>37</sup> Miñe rne naa lo to nu xtiidz Dios naca, zha ne rteed xtiidz me lo to i, zha ne rapgaa pe stib guielbiini ne rneedz Espiritu Sant, zha co gunbey ganle nli miñe rnabey mew.

<sup>38</sup> Zha ne gliladzdgaaw, maase gliladzd zhow.

<sup>39</sup> Sca nagon naca. Goltsoxco sca ygaa to guielbiini cteed to xtiidz Dios lo miech, zeena gacnañ zho zha racladz Dios gban zho; per scagaa, ib ycade to tel cho zha ne rnee stib diidz. <sup>40</sup> Per zigne rne naa ga, grëse miñe gun to none zaacse gun tow, tib tiba gacsew hor ne rieguiala.

## 15

### *Brieaban Jesús*

<sup>1</sup> Bets, bzian, nu laa naa gbire gzet lo to ganle zha nac Xtiidz Dios. Zigne bialseed naa tow, scataque naca; led yeda rdzëë. Lëew ga pcaania to, ni haxta niinagaa rliladz tow. <sup>2</sup> Lëew rlu zha grieelo ycaania Dios to, totsaque nli dib zdoo to bliladz tow, ni bii lëëgaaw rnalo to.

<sup>3</sup> Zeene bial naa lo to i, pseed naa tow zigne pcaaniase naaw. Gocnan to cho nac Jesús, gocnan to por xtol ne gut me lo cruz, zigne zhobneesew lo Xtiidz Dios. <sup>4</sup> Gocnan to ganle zeene goc tson ngbidz pqueets zho me laa me brieaban, zigne raquietaquew lo Xtiidz Dios. <sup>5</sup> Len dze ne brieabanle me ga, gonlo Pedr me, niicle grëragaa zha ne nacgza Pedr bzënie zho me, gonlo zho me sac güeyted me lo zho. <sup>6</sup> Güey me güeyted me zaatne ndxie ndziibsrää gaay gayoo zha ne nole xnëz me, grëse zho gon me; ndal zha co bii mban niina. <sup>7</sup> Bded ga gonaque Santiagw me, ni biire güey me lo zha ne bzënie me ga stib; <sup>8</sup> goc palal tiempa, lega naclew haxta lo naa brieequia me. Tel naa gon, rrieequia nac naa zig tib mëed ne rzamëed, <sup>9</sup> lo grëraa zha ne nac poxtl, ni lalnu peet nond naa, per ni rdzieeld gnee zho naa poxtl; sac gon pa lotaa ptsidil naa grë zha ne glopaa bzëeb xnëz Dios. <sup>10</sup> Per xquizh Dios tibaque noxco me naa, bzooblo me naa gane laa naa nac mine nac naa niina. Ni led zhlëdgaa bzooblo me naa, sac gon nroobraa xtsiin me noyun naa lo mine noyun grëraa poxtl; per rned naa togo naase quiayuna, sinque me noyacnie naa rrieelo noyun naaw.

<sup>11</sup> Laa naa rzet min rii, per nacda par glu dien cho nroobraa noyun xtsiin me, sac mine mazdraa non nac ne noseed no miech Xtiidz me; lëew biadseed no to, ni biladzdgaä tow.

<sup>12</sup> Nana sca, racladz naa gnë to dien zha nacne no bla to i rnee nlid grieaban mengut; led wen wen name gocnan to brieaban Jesús. <sup>13</sup> Telne rnee to nlid grieelo grieaban mengut, rrieequia gon rnee to ga nlid brieaban Jesús. <sup>14</sup> Nana telne brieeband me, paat rquiind mine dzigo noseed no miech nu, zhlëse znu noteed-xtse ne rnalo ne Dios. <sup>15-16</sup> Rrieequia noquidiee no miech, sac gon tibaque rnee no lo zho bleeban Dios Jesús; ni telne nli rrieeband

mengut, ye Jesús dzigo bii noliu me niina. <sup>17</sup> Siba, telne nlid brieaban me, zhlëse dzigo rnaló to me ycaania me to; telne nlid brieaban me, scase bii zëeb to grë xtol to. <sup>18</sup> Grë zha ne bliladz me, zha ne nacle mengut niina, lëë bnitlole zho ga dzigo. <sup>19</sup> Nana telne loxaque lo guielmban riise nona gnalo ne Jesús, ne dzigo nac miech ne mazdraa nxen.

<sup>20</sup> Per gacnan to sca ganle, ¡brieaban Jesús! Me nac men ne gloopaa brieaban lo grëraa miech guizhiu ne grieaban. <sup>21</sup> Grëse ne ne nac ne miech, ible laa ne none guet; sac laa guielgut biaan por mine been Adán; per niina ne laa Jesús bиаad, por mine been me grëse mengut laa zho none grieaban. <sup>22</sup> Zigne grëse miech ret porne ziaad zho lo xtii Adán, scaquegaa grëse zha ne gbig lo Jesús, zгаа zho tib guielmban ndzon. <sup>23</sup> Ible sca none gaca, ndion ne ganle laa Jesús brieabanle, ni zeene laa me guiaad, grë zha ne no xnëz me laa zho grieaban. <sup>24</sup> Gal dze co laa me lozh gnitlo mendox ni grëraa ma ne nacie ma, dzigo laa me csan grëse miech ne no xnëz me lадznia Dios men ne nac Pxož me; dze cotaа nagon laa Dios gun guielwxtis. <sup>25-26</sup> Sac ible Jesús nonabey haxta gdziñ dze co, zeene laa me gnitlo grëse meyožh ne rlëë lo me; zig nac guielgut, lëew nac mine lultm gnitlo me. <sup>27</sup> Zigne zhobneeque lo Xtiidz Dios, ladznia me biaan grëtaa ncuaane no; per guiabd ne togo ye Dios no ladznia me, sac gon Dios nac men ne bdeeda lo me. <sup>28</sup> Gacxe waa, zeene gal dze ne laa me sca lozh gnitlo grë zha ne rlëë lo me, Pxož me nac men ne gnabey lo me; sac gon men co gocnie me been me gan, ni men co nac men ne rnabey.

<sup>29</sup> Nana, ne rnee to i nlid rrieaban mengut, ¿pe nac dzigo no zha ne rrobnis xcuent zha ne gutle? <sup>30</sup> Telne niaca mine nlid grieaban mengut, ¿pe nac nadien znu gzataa dze quiabeeladz no no lo grë guielxtseeb? <sup>31</sup> Bets,

bzian, nligaaw tel naa gon gzataa dze noxtseeb naa lo guielgut; nanle to ganle zeene rne naa rleynie naa to, diidzli rnee naa; scaquegaa niina, mine rnee naa nu diidzliw. <sup>32</sup> Ne nligaa zeene glo bial naa guiedz Efés nu, ntseeb goc miech rii lo naa, pale grë ma ntseeb. Telne nlid grieeban mengut, zhlëse dzigo nodeed naa grë min co; mazd tel zhataa dzigo gban ne, zigne rëbaque diidz ne rëb: “;Golgotsaa dioow ne, golgotsaa dio ne, benque guielgutse quiambiaaz ne!”

<sup>33</sup> Per lëda ga gon. Zha ne ziena min co, ib yquiaadi-agde to xtiidz zho, zeena gacde to zigne nac zho; zigne zëëbaque diidz: “Telne ndzinlid miech ne ctsieelsa luu, zdzin dze ne gac luu zigne nac zho.” <sup>34</sup> Golquix biini sca, gunctaldræa to xtol to; pe rtoladzde to, golwi ganle no bla to i gard sëëb xnëz Jesús, haxta ni riend zho zhapaa nac Dios.

### *Zha grieeban mengut*

<sup>35</sup> Nana, no to gnë: “;Per zha grieeban mengut? ;Zhazhe nac cuerp ne grieebannie zho?” <sup>36</sup> ;Aque nxen wnabdiidz co! ;Pe rande to zig nac grë midz ne rio liu rac bni, rlozhse rnitlo midz co dzigo laa guizh ne naca ga rlan? <sup>37</sup> Tel rnee to zha nac cuerp ne grieebannie zho, golwi ganle zig nac zhobxtil, zig nac grëragaa midz, ;pe niacxe zigne nacsew riow liu, scasaque naca rlana? Led zeene laaw rlan, guizhle naca. <sup>38</sup> Tib midzse naca riow liu, Diosle nac men ne rdeed zhiblaga zigne racladz me. Tib tib midz, psanle me dien zha gluw zeene laaw glan. <sup>39</sup> Zigne zhaase zhaase nac tib tib midz, tib tib guizh, scaque nzian lo cuerp no.

Zig nac miech, zhaa nac xcuerp zho lo xcuerp ma, niicle magaaw, zhaa nac xcuerp ma ne no lo liu, zhaa nac xcuerp ma ne no lo nis, ni zhaaque nac xcuerp ma ne rsiibe. <sup>40</sup> Grë anjl ne no gbaa, zhaa nac xcuerp zho



lo xcuerp ne nac ne miech guidzliu; zhaa nac xquielniow cuerp co lo xquielniow cuerp ne no lo guidzliu. <sup>41</sup> Gotsaa gwi ne ganle, zig nac xbiini ngbidz zhaa naca lo xbiini mēē, lo xbiinigaa mel. Niicle melgaaw, zhaase zhaase nac xbiini ma tib tib ma, no ma palalse rlu, nogaa ma roḷ rna. <sup>42</sup> Scadaa nagon, zhaa rlu cuerp ne rap miech niina, ni zhaagaa glu minē ygaa zho zeene laa zho grieeban. Cuerp ne rdziaap ne niina, ncuanea tib rded naca, sangue cuerp ne grieebannie ne gal dze co, led yedraa min co nitlo. <sup>43</sup> Mban nac cuerp rii, sac rzacnēw, reta; sangue cuerp ne grieebannie ne, tib cuerp ne gdziṅd dze nitlo gaca. Lega zozhidz cuerp rii, sangue cuerp co tib cuerp ndip ndaan gaca. <sup>44</sup> Cuerp ne rdziaap ne niina, tib cuerp ngoopdoḷ naca, sangue cuerp ne grieebannie ne, min co gac tib cuerp ne gban zigne racladzpaā Dios. Sac zigne znu no cuerp ne rquiin lo guielmban rii, scaquegaa no minē yquiin stib lo guielmban ne gneedz Dios.

<sup>45</sup> Golsoladz ganle, rnee lo Xtiidz Dios Adán goc miech ne glopaa biaan ni Dios nac men ne bdeed guielmban lo Adán; sangue Jesús, me rap guielmban, ni zrieelo gdeed me guielmban co lo miech. <sup>46</sup> Scaque nagon, glo rgaa ne cuerp ngoopdoḷ ne rdziaap ne niina, dzigoraa ygaa ne cuerp ne gban zigne racladzpaā Dios. <sup>47</sup> Gotsaa gwi ne ganle, zeene biaan Adán yudiese bzaa Dios me; sangue Jesús, men gbaa nac me. <sup>48</sup> Grēse ne nac ne miech, cuerp ne rdziaap ne lo guielmban rii, zigne gocdaa xcuerp Adán naca; per zha ne gnalo Jesús, zeene laa zho grieeban laa zho gapple tib cuerp zigne nac xcuerp me. <sup>49</sup> Masaque nac ne niina zigne goc Adán, ni scaquegaa zdziṅ dze ne glu ne zigne rlu Jesús. <sup>50</sup> Gulgacnan sca ganle, cuerp ne rdziaap ne lo guidzliu rii, grieelod gdziṅa zaatne rnabey Dios; sac rdziṅ dze ne rnitlow, grieelod gaca tib cuerp ne guete.

<sup>51</sup> Wen wen golzoobdiag minē gne naa lo to nu ganle,

waltaa choot gard gacna<sub>u</sub>: Grëse ne ne nac ne zha ne rnalo Jesús, gal dze co zigtaa zha ne mbana, zha ne gutlegaaw ible stsëe Dios xcuerp ne. <sup>52</sup> Znuse gac min<sub>u</sub> co zig nacse zeene riab tib belye; lëe min<sub>u</sub> co gac lultm vuelt ne ycuedz xanj<sub>l</sub> Dios zhitrompet zho. Zeene sedz trompet co, hor co grëse zha gut, laa zho grieebannie tib cuerp ne gdzindraa dze nitlo; scagaa grë zha ne bii zomban, hor co laa xcuerp zho gdzëe. ¡Grëse ne dziaap tib cuerp cub! <sup>53</sup> Ible sca none gaca, ib none gdzëe xcuerp ne gaca tib cuerp ne xind, tib cuerp ne gdzindraa dze nitlo. <sup>54</sup> Zeene gac min<sub>u</sub> co, ga grieequia mine raquiet lo Xtiidz Dios zaatne rnee: “Nasi laa guielgut bnitlo, guielmbanle nac mine rnabey. <sup>55</sup> Ah guielguta, ¿yora na zeene scataa psacsi luu? ¿Yora zeene scataa gocndip xtiidz luu?” <sup>56</sup> Griee lodraa pe gun<sub>u</sub> guielgut ne hor co, sac led yedraa hor co tso dol, led yedraa hor co gnabey ley; sac por dol gane rrieelo rsacsi guielgut ne niina, ni por ley rlu pe nac xtol<sub>l</sub> ne. <sup>57</sup> ¡Xquizh xquieInzaac Dios pxeel<sub>l</sub> me Jesús, sac gon<sub>u</sub> por Jesús zrieelo griee ne ladznia guielgut!

<sup>58</sup> Bets, bzian, ne nac to zha ne rleynie naa, golguien<sub>u</sub> sca tibaque dziits golso lo Xtiidz Dios; zig zie dze goltsoxcoraa golgun<sub>u</sub> xtsiin<sub>u</sub> me, benque nanle to ganle, grëse xtsiin<sub>u</sub> me mine rdziuu<sub>u</sub> ne nacda ncuaane zhlëse.

## 16

### *Gon ne guey Jerusalén*

<sup>1</sup> Laa zig nac gon ne noyaclo guey gac xyudar grëraa zha ne no xnëz Jesús Jerusalén, laa naa rso diidz lo to zigne psoque naa diidz lo zha Galás.

<sup>2</sup> Tel palal run<sub>u</sub> to gan tib len<sub>u</sub> zhmal, lo co golcob mine ral zdoo to gdeed to gac gon co; gzobse dze goltsiesana lo zha ne noyunlow. Adel<sub>l</sub> na ganle haxta glansoraa naa i, dzigoraa no to dien<sub>u</sub> zha topa. <sup>3</sup> Ni golzoobloga dien<sub>u</sub> bla

zha ne tsie tsiesana, na zeene glanso naa i dzigo yquia naa tib guits ne güey zho tsiesan zhow; <sup>4</sup> ni tel rquiinpagaa ye naa ga, dzigo na maase ga naa ganie naa zho.

<sup>5</sup> Len dze rii no guic naa gateed naa nëz Macedon, dzigo gale grie naa glanso naa lo to i. <sup>6</sup> Nend zbëz naa lo to i palal dze, togo iquegaa teed naa len mëe nal ne ziaad; ni racladz naa zeene gbi naa i, siguiel to gun to xyudar naa tel pa nëz ne no ga naa len dze co. <sup>7</sup> Telne zneedz Dios diidz cuëz naa lo to grë len dze co, zbëz naa, sac racladzd naa tib guialteed naa lo to i. <sup>8-9</sup> Niina ne no naa Efés nu, len dze riipaa rlu ndal miech ne no liaadz ycaania Xtiidz Dios, gane zbëz naa nu haxta ted lni Pentecostés. Nligaa ndal zha ne no liaadz co, per scagaa ndalaeque zha ne rtsidila.

<sup>10</sup> Nacle diidz laa Timoté guiaad i; tel nand new naraa guiaad me, golsiguiel zeene glanso me zaacse golcaania me, zaacse golcuëzlo me, zeena tsonley zdo me; golgan ganle, ye me quiayun xtsiin men ne rnabey ne. <sup>11</sup> Golguien csanwinde to me, sinque golgap me respet; zeena zeene glanso me lo naa nëz rii ine nley gac me csoladz me zha biaadted me lo to i. Laa naa quiambëz glanso me nëz rii, gza me zha ne guiaadnalraa zhits me.

<sup>12</sup> Sangue bets ne Apol, blactaa bnaab naa lo me niaadgza me zha ne ziaad i niaadgan me to, per rzac me grieloda niina. Rien naa zeene gdeedtaaw diidz, ible ziaad me ziaadgan me to.

<sup>13</sup> Bets, bzian, nsin golso, tibaque gonalno Dios. Ib ctsëede to xtiidz to, tibaque goltsoxco tsienal to mine rnabey me. <sup>14</sup> Ncuuane guntaa to, golconie guic to gun tow porne rleynie to Dios, porne rleyniegaa to samiech to.

<sup>15-16</sup> Laa naa rso diidz lo to, niowse gon golgac lo grë zha bets ne, zha ne run xyudar to i; zig nac Stef grë menlidz me, golgon xtiidz zho. Led nanle to ganle, Stef nac tib men

ne glopaa bliladz Xtiidz Dios nēz Gres i grē menlidz me; ni desde dze co laa me pquiabladz tibaque squi quiaayun me xyudar grēraa zha ne no xnēz Jesús. <sup>17</sup> Rley naa gon zeene gon naa laa me blanso nu gza me Fortunat ni Acaic, haxta stib goc zdoo naa gocnan naa zha no to, masaque gun naa cuent grēle lo to ga gon naa. <sup>18</sup> Ne nligaa bloonley zho zdoo naa, ni rien naa scaquegaa to nley gac to niina zeene gon to zha no naa. Golguien gon zha non nac zho, golwi ganle pa lotaa nac dziin ne quiaayun zho.

<sup>19</sup> Grēse zha ne no xnēz Jesús nēz Asia nu, laa zho rxeel bdiuzh lo to, golcaania zhibdiuzh zho. Scaque Aquil grop me Priscil, ni grēraa zha ne rcaalsa lidz zho rieseed Xtiidz Dios, grē zho laa zho rxeel bdiuzh lo to. <sup>20</sup> Scagaa grē zha ne no nu, ye zho laa zho rquiaabdiuzh to. Zeene ycaalsa to i, ine golnaaznialsa, golqueedzlsa, golcaania zhibdiuzh no.

<sup>21</sup> Nu laa naa cso schop lan xtidz naa lo to, ni golwi ganle naazhal yquiaw: <sup>22</sup> Grēse zha ne gon nēd gleyniepaa Jesús, miech ndziibdeele ga nac zho. ¡Ni ile gon ziaad me! <sup>23</sup> Mese nac men ne gacnien to, me nac men ne no zhixco to, sac ne nligaa rleynie me to.

<sup>24</sup> Niicle naaw rleynie naa to, sac gon tibaque nac ne ngab ne lo me. ¡Lēed bii gdzieel ne sca!

Pabl

## Diidz ne rdeed guielmban

New Testament in Zapotec, Mixtepec (MX:zpm:Zapotec, Mixtepec)  
copyright © 1998 Wycliffe Bible Translators, Inc.

Language: Mixtepec Zapotec (Zapotec, Mixtepec)

Translation by: Wycliffe Bible Translators, Inc.

Zapoteco, Mixtepec [zpm], Mexico

### Copyright Information

© 1998, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Mixtepec

### © 1998, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

PDF generated using Haiola and XeLaTeX on 14 Jun 2022 from source files dated 9 Jun 2022

5317ca58-7555-5e4c-a420-e1e9210e2df2